

史

記

二
一



孟子荀卿列傳第十四

史記七十四

索隱曰按序傳孟嘗君第十四而此傳爲第十五蓋後人差降之矣

史公曰余讀孟子書至梁惠王問何以利吾國未嘗不廢書而歎也曰嗟乎利誠亂之始也夫子罕言利者常防其原也故曰放於利而行多怨自天子至於庶人好利之弊何以異哉

孟軻鄒人也

索隱曰軻音苦何反又苦賀反鄒魯地名又云邾邾人徙鄒故也○正義曰軻字子輿爲

齊卿鄒兖州縣

受業子思之門人

索隱曰王劭以人爲衍字則以軻親受業孔伋之門

也今言門人者乃受業於子思之弟子也

道旣通游事齊宣王宣王不

能用適梁梁惠王不果所言則見以爲迂遠而

闊於事情當是之時秦用商君富國彊兵楚魏
用吳起戰勝弱敵齊威王宣王用孫子田忌之
徒而諸侯東面朝齊天下方務於合從連衡以
攻伐爲賢而孟軻乃述唐虞三代之德是以所
如者不合退而與萬章之徒索隱曰孟子有萬章公明高等蓋並軻之門人也萬姓章名序詩書述仲尼之意作孟子七篇其後
有騶子之屬齊有三騶子其前鄒忌以鼓琴干
威王因及國政封爲成侯而受相印先孟子其
次騶衍後孟子騶衍睹有國者益淫侈不能尚
德若大雅整之於身施及黎庶矣乃深觀陰陽

消息而作怪迂之變終始大聖之篇十餘萬言其語閎大不經必先驗小物推而大之至於無垠先序今以上至黃帝學者所共術大並世盛

衰

並音蒲浪反○索隱曰言其大體隨代盛衰觀時而說事

因載其機祥度制推

而遠之至天地未生窈冥不可考而原也先列

中國名山大川通谷禽獸水土所殖物類所珍

因而推之及海外人之所不能睹稱引天地剖

判以來五德轉移治各有宜而符應若茲以爲

儒者所謂中國者於天下乃八十一分居其一

分耳

索隱曰桓寬王充並以衍之所謂迂怪虛妄災感六國之君因納其異說所謂匹夫而災感諸侯者也

中國名曰赤縣神州赤縣神州內自有九州禹
之序九州是也不得爲州數中國外如赤縣神
州者九乃所謂九州也於是有裨海環之索隱曰裨音脾裨海小海也九州之外更有大瀛海故知此裨是小海也且將有裨將裨是小義也人民禽獸莫
能相通者如一區中者乃爲一州如此者九乃
有大瀛海環其外天地之際焉其術皆此類也
然要其歸必止乎仁義節儉君臣上下六親之
施始也濫耳索隱曰濫即濫觴是江原之初始故此文意以濫爲初也謂術之術言君臣上下六親之際行事之所施所治皆可王公大人初見其術
懼然顧化索隱曰懼音劬謂術之術皆動人心見者莫不懼然駐想又內心留顧而已化之欲從其術也

化者是易常聞而貴異術也

其後不能行之是以騶子重於齊

適梁惠王郊迎執賓主之禮適趙平原君側行

檄席

索隱曰按字林云檄音疋結反韋昭音敷蔑及張揖三蒼訓詁云檄拂也謂側行而衣檄席為敬不敢正

坐當賓主之禮也

如燕昭王擁彗先驅

索隱曰彗帚也謂為之掃地以衣被擁帚而却

行恐塵埃之及長者所以為敬也

請列弟子之座而受業築碣石

宮

正義曰碣石宮在幽州薊縣西三十里寧臺之東

身親往師之作主運

索隱

曰劉向別錄云鄒子書有主運篇

其游諸侯見尊禮如此豈與仲

尼菜色陳蔡孟軻困於齊梁同乎哉

索隱曰仲尼孟子法先王

之道行仁義之化且菜色困窮而鄒衍執詭怪熒惑諸侯其見禮重如此可為長太息哉

故武王以仁

義伐紂而王伯夷餓不食周粟衛靈公問陳而

孔子不答梁惠王謀欲攻趙孟軻稱太王去邠

索隱曰孟子太王去邠是軻對滕文公此豈有意阿世語今云梁惠王謀攻趙與孟子不同

俗苟合而已哉持方枘欲內圓鑿其能入乎

曰方枘是筍也圓鑿是孔也謂工人斲木以方筍而內之圓孔不可入也故楚詞云以方枘而納圓鑿者吾知其齟齬而不入也謂戰國時仲尼孟軻以仁義干世主猶方枘圓鑿然也

或曰伊尹負鼎而勉

湯以王百里奚飢牛車下而繆公用霸作先合

然後引之大道騶衍其言雖不軌儻亦有牛鼎

之意乎

索隱曰呂氏春秋云涇牛之鼎不可以烹雞是其有牛鼎也言衍之術迺大儻若大用之是有牛鼎之意而誰周亦云觀太史公此論是愛奇之甚矣

自騶衍與齊之稷下先生

如淳于髡慎到環淵接子田駢騶奭之徒

索隱曰按

稷齊之城門也或云稷山名謂齊之學士集於稷門之下也
環淵接子古著書人之稱號也駢音步堅反又步經反○正
義曰慎子十卷在法家則戰國時處士接子二篇田子二十
五篇齊人游稷下號天口接田二人道家騶奭十二篇陰陽

家各著書言治亂之事以干世主豈可勝道哉

淳于髡齊人也博聞彊記學無所主其諫說慕
晏嬰之爲人也然而承意觀色爲務客有見髡
於梁惠王惠王屏左右獨坐而再見之終無言
也惠王怪之以讓客曰子之稱淳于先生管晏
不及及見寡人寡人未有得也豈寡人不足爲
言邪何故哉客以謂髡曰固也吾前見王王
志在驅逐後復見王王志在音聲吾是以默然

客具以報王王大駭曰嗟乎淳于先生誠聖人也前淳于先生之來人有獻善馬者寡人未及視會先生至後先生之來人有獻謳者未及試亦會先生來寡人雖屏人然私心在彼有之索隱
曰謂私心實在彼馬與謳也
有之謂我實有此二事也
後淳于髡見壹語連三日三夜無倦惠王欲以卿相位待之髡因謝去於是迭以安車駕駟束帛加璧黃金百鎰終身不仕

慎到趙人田駢接子齊人環淵楚人皆學黃老道德之術因發明序其指意故慎到著十二論

徐廣曰今慎子劉向所定有四十一篇

環淵著上下篇而田駢接子皆

有所論焉

騶奭者齊諸騶子亦頗采騶衍之術以紀文於

是齊王嘉之自如淳于髡以下皆命曰列大夫

為開第康莊之衢

爾雅曰四達謂之衢五達謂之康六達謂之莊

高門大屋

尊寵之覽天下諸侯賓客言齊能致天下賢士

也

荀卿趙人

索隱曰名况卿者時人相尊而號為卿也仕齊為祭酒仕楚為蘭陵令後亦謂之孫卿子者避

漢宣帝之諱也

年五十始來遊學於齊騶衍之術迂大

而閎辯奭也文具難施淳于髡久與處時有得

善言故齊人頌曰談天衍雕龍夔炙轂

徐廣曰一作亂

調過髡

劉向別錄曰騶衍之所言五德終始天地廣大書言天事故曰談天騶夔脩衍之文飾若雕鏤龍文

故曰雕龍別錄曰過字作騶騶者車之盛膏器也炙之雖盡猶有餘流者言淳于髡智不盡如炙騶也左思齊都賦注曰

言其多智難盡如炙膏過之有潤澤也○索隱曰劉氏云轂衍字也今按文無炙轂過過則是器名音如字謂盛胎之器

名過與鍋字相近蓋即胎器也轂即車轂過爲潤轂之物則轂非衍字明矣

田駢之屬皆已

死齊襄王時

索隱曰襄王名法章潛王子莒人所立者

而荀卿最爲老

師齊尚脩列大夫之缺而荀卿三爲祭酒焉

索隱

曰禮食必祭先飲酒亦然必以席中之尊者一人當祭耳後因以爲官名故吳王濞爲劉氏祭酒是也而卿三爲祭酒者

謂荀卿出入前後三度廼列大夫康莊之位而皆爲其所尊故云三爲祭酒

齊人或讒荀卿

荀卿乃適楚而春申君以爲蘭陵令

正義曰蘭陵縣屬東海郡

孟子荀卿傳

今沂州承縣有蘭陵山

春申君死而荀卿廢因家蘭陵李斯

嘗爲弟子已而相秦荀卿嫉濁世之政亡國亂君相屬不遂大道而營於巫祝信機祥鄙儒小拘如莊周等又猾稽亂俗於是推儒墨道德之行事興壞序列著數萬言而卒因葬蘭陵而趙亦有公孫龍爲堅白同異之辯

晉太康地記云汝南西平縣有龍淵水可

用淬刀劍特堅利故有堅白之論云黃所以爲堅也白所以爲利也或辯之曰白所以爲不堅黃所以爲不利○索隱曰龍即仲尼弟子也此云趙人弟子傳作衛人鄭玄云楚人各不能知其真又下文云並孔子同時或云在其後所以知非別人也○正義曰藝文志公孫龍子十四篇顏師古云卽爲堅白之辯按平原君傳鄒衍同時括地志云西平縣豫州西北百四十里有龍淵水也

劇子之言

徐廣曰按應劭氏姓注直云劇子也○索隱曰著書之人姓劇氏而

稱子也前史不記其名故趙有劇孟及劇辛也

正義曰藝

文志李子三十二篇李悝相魏文侯富國強兵

楚有尸子長盧

劉向別錄曰楚有尸子疑謂其

在蜀今案尸子書晉人也名佼秦相衛鞅客也衛鞅商君謀事畫計立法理民未嘗不與佼規也商君被刑佼恐井誅乃

亡逃入蜀自爲造此二十篇書凡六萬餘言卒因葬蜀○索隱曰尸子名佼音絞長盧未詳○正義曰長盧九篇楚人

阿之吁子焉

徐廣曰阿者今之東阿○索隱曰吁音芋別錄作芋子今吁亦如字○正義曰按東齊州

也藝文志云吁子十八篇名嬰齊人七十子之後顏師古云音弭按是齊人阿又屬齊恐顏公誤也

自如孟

子至于吁子世多有其書故不論其傳云蓋墨

翟宋之大夫善守禦爲節用

墨子曰公輸般爲雲梯之械成將以攻宋墨子

聞之至于郢見公輸般墨子解帶爲城以牒爲械公輸般九設攻城之機變墨子九距之公輸般之攻城盡墨子之守固

有餘公輸般詘而言曰吾知所以距子矣吾不言墨子亦曰吾知子之所以距我者吾不言楚王問其故墨子曰公輸子

孟子荀卿傳

之意不過欲殺臣殺臣宋莫能守可攻也然臣之弟子禽滑
釐等三百人已持臣守國之器在宋城上而待楚寇矣雖殺
臣不能絕也楚王曰善哉吾請無攻宋城矣○索隱曰公輸
爲雲梯之械者按梯構木瞰高也雲者言其昇高入雲故曰
雲梯械者器也謂攻城之樓櫓也與器械同墨子解帶爲城
者謂墨子所術解身上革帶以爲城也以牒爲械者牒小木
札也械者樓櫓等公輸般之攻城械盡者劉氏云械謂飛梯撞
車飛石車弩之具也訕音屈謂般技已盡墨守有餘滑釐者
墨子弟子之字也釐音狸

或曰並孔子時或曰在其後

索隱曰按別錄云墨

子書有文子文子子夏之弟子問於墨子如此則墨子者在七十子之後也

索隱述贊曰

六國之末

戰勝相雄

軻遊齊魏

其說不通

退而著述

稱吾道窮

蘭陵事楚

鄒衍談空

康莊雖列

莫見收功

孟子荀卿列傳第十四

史記七十四

孟子荀卿傳

盡官君列傳第十五

史記七十五

孟嘗君名文姓田氏文之父曰靖郭君田嬰田

嬰者齊威王少子而齊宣王庶弟也

索隱曰戰國策及諸書並

無此言蓋諸田之別子也故戰國策每稱嬰子盼子高誘注云田盼田嬰也王劭又按戰國策云齊貌辨謂宣王曰王方爲太子時辨謂靖郭君不若發太子更立郊師靖郭君不忍宣王太息曰寡人少殊不知以此言之嬰非宣王弟明也

田嬰自威王時任職用事與成侯鄒忌及田忌將而救韓伐魏成侯與田忌爭寵成侯賣田忌田忌懼龍齊之邊邑不勝亡走會威王卒宣王立知成侯賣田忌乃復召田忌以爲將宣王二年田忌與孫臏田嬰俱伐魏敗之馬陵虜魏太

子申而殺魏將龐涓

索隱曰紀年當梁惠王二十八年至三十一年改爲後元也

宣

王七年田嬰使於韓魏韓魏服於齊嬰與韓昭

侯魏惠王會齊宣王東阿南

正義曰東阿齊州縣也

盟而去

索隱曰紀年當惠王之後元十一年作平阿又云十三年會齊威王于甄與此明年齊宣王與梁惠王會甄文同但齊之

威宣二王文

舛互不同也明年復與梁惠王會甄

音是是歲梁惠

王卒宣王九年田嬰相齊齊宣王與魏襄王會

徐州而相王也

正義曰紀年云梁惠王三十一年下邳遷于薛改名徐州

楚威王

聞之怒田嬰明年楚伐敗齊師於徐州而使入

逐田嬰田嬰使張丑說楚威王威王乃止田嬰

相齊十一年宣王卒湣王即位即位三年而封

田嬰於薛

索隱曰紀年以爲梁惠王後元十三年四月齊威王封田嬰于薛十月齊城薛十四年薛

子嬰來朝十五年齊威王薨嬰初封彭城皆與此文異○正義曰薛故城在今徐州滕縣南四十四里也

初田

嬰有子四十餘人其賤妾有子名文文以五月

五日生嬰告其母曰勿舉也其母竊舉生之

索隱

曰上舉謂初誕而舉之下舉謂浴而乳之生謂長養之也

及長其母因兄弟而見

其子文於田嬰田嬰怒其母曰吾令若去此子

而敢生之何也文頓首因曰君所以不舉五月

子者何故嬰曰五月子者長與戶齊將不利其

父母

索隱曰風俗通云俗說五月五日生子男害父女害母也

文曰人生受命於

天乎將受命於戶邪嬰默然文曰必受命於天

君何憂焉必受命於戶則高其戶耳誰能至者
嬰曰子休矣久之文承間問其父嬰曰子之子
爲何曰爲孫孫之孫爲何曰爲玄孫玄孫之孫
爲何曰不能知也索隱曰爾雅云玄孫之子爲來來孫之子爲昆昆孫之子爲仍仍孫之子爲雲又有耳孫亦是玄孫之子不同也文曰君用事相齊至今三王矣
齊不加廣而君私家富累萬金門下不見一賢
者文聞將門必有將相門必有相今君後宮蹈
綺縠而士不得短褐索隱曰短亦音豎豎且褐謂褐衣而豎裁之以其省而便事也僕
妾餘粱肉而士不厭糟糠今君又尚厚積餘藏
欲以遺所不知何人索隱曰遺音維季反猶言不知欲遺與何人也而忘公

家之事曰損文竊怪之於是嬰乃禮文使主家待賓客賓客曰進名聲聞於諸侯諸侯皆使人請薛公由嬰以文爲太子嬰許之嬰卒謚爲靖郭君

皇覽曰靖郭君冢在魯國薛城中東南陬○索隱曰謚爲靖郭君者謂死後別號之曰靖郭耳則靖郭或封邑號故漢齊王舅父駟鈞封靖郭侯是也

取音鄒亦音緬陬者城隅也

而文果代立於薛是爲

孟嘗君孟嘗君在薛招致諸侯賓客及亡人有罪者皆歸孟嘗君孟嘗君舍業厚遇之

索隱曰舍業者

捨棄其家產業而厚事賓客也劉氏云舍音赦謂爲之築舍立居業也

以故傾天下之士

食客數千人無貴賤一與文等孟嘗君待客坐語而屏風後常有侍史主記君所與客語問親

戚居處客去孟嘗君已使使存問獻遺其親戚
孟嘗君曾待客夜食有一人蔽火光客怒以飯
不等輟食辭去孟嘗君起自持其飯比之客慙
自劉士以此多歸孟嘗君孟嘗君客無所擇皆
善遇之人人各自以爲孟嘗君親已秦昭王聞
其賢乃先使涇陽君爲質於齊以求見孟嘗君
孟嘗君將入秦賓客莫欲其行諫不聽蘇代謂
曰今且代從外來見木偶人與土偶人相與語
索隱曰偶音遇謂以土木爲之偶類於人也蘇代以土偶比涇陽君木偶比孟嘗君木偶人曰天
雨子將敗矣土偶人曰我生於土敗則歸土今

天雨流子而行未知所止息也今秦虎狼之國也而君欲往如有不得還君得無爲土偶人所笑乎孟嘗君乃止齊湣王二十五年復卒使孟嘗君入秦昭王即以孟嘗君爲秦相人或說秦昭王曰孟嘗君賢而又齊族也今相秦必先齊而後秦秦其危矣於是秦昭王乃止囚孟嘗君謀欲殺之孟嘗君使人抵昭王幸姬求解索隱曰抵幸姬曰妾願得君狐白裘音丁禮反按抵謂觸冒而求之也曰以

狐之白毛爲裘謂集狐腋之毛言美而難得者

此時孟嘗君有一狐白裘直

千金天下無雙入秦獻之昭王更無他裘孟嘗

君患之徧問客莫能對最下坐有能為狗盜者

曰臣能得狐白裘乃夜為狗以入秦宮藏中

正義

藏在浪反

取所獻狐白裘至以獻秦王幸姬幸姬為

言昭王昭王釋孟嘗君孟嘗君得出即馳去更

封傳變名姓以出關

索隱曰更改也改前封傳而易姓名不言是孟嘗君封傳今之

驛券也

夜半至函谷關

正義曰關在陝州桃林縣西南十三里

秦昭王

後悔出孟嘗君求之已去即使人馳傳逐之孟嘗君至關關法雞鳴而出客孟嘗君恐追至客之居下坐者有能為雞鳴而雞盡鳴遂發傳出如食頃秦追果至關已後孟嘗君出乃還始

孟嘗君列此二人於賓客賓客盡羞之及孟嘗君有秦難卒此二人拔之自是之後客皆服孟嘗君過趙趙平原君客之趙人聞孟嘗君賢出觀之皆笑曰始以薛公爲魁然也今視之乃眇小丈夫耳孟嘗君聞之怒客與俱者下斫擊殺數百人遂滅一縣以去齊湣王不自得以其遣

孟嘗君

索隱曰得一作德是湣王遣孟嘗君自言已無德故也

孟嘗君至則以

爲齊相任政孟嘗君怨秦將以齊爲韓魏攻楚

因與韓魏攻秦

徐廣曰年表曰韓魏齊共擊秦軍於函谷

而借兵食於

西周蘇代爲西周謂曰

索隱曰戰國策作韓慶爲西周謂薛公也

君以

齊爲韓魏攻楚九年取宛葉以北以彊韓魏

正義

曰宛在鄧州葉在許州二縣以
北舊屬楚二國共沒以入韓魏今復攻秦以益之韓

魏南無楚憂西無秦患則齊危矣韓魏必輕齊

畏秦臣爲君危之君不如今弊邑深合於秦而

君無攻又無借兵食君臨函谷而無攻今弊邑

以君之情謂秦昭王曰薛公必不破秦以彊韓

魏其攻秦也欲王之令楚王割東國以與齊

正義

曰東國
齊徐夷而秦出楚懷王以爲和君令弊邑以此

惠秦秦得無破而以東國自免也秦必欲之楚

王得出必德齊齊得東國益彊而薛出也無患

矣秦不大弱而處三晉之西三晉必重齊薛公
曰善因令韓魏賀秦使三國無攻而不借兵食
於西周矣是時楚懷王入秦秦留之故欲必出
之秦不果出楚懷王孟嘗君相齊其舍人魏子
爲孟嘗君收邑入

索隱曰舍人官微記姓而略其名
故云魏子收謂收其國之租稅

三

反而不致一入孟嘗君問之對曰有賢者竊假

與之以故不致入孟嘗君怒而退魏子居數年

人或毀孟嘗君於齊湣王曰孟嘗君將爲亂及

田甲劫湣王湣王意疑孟嘗君子孟嘗君乃奔

索隱

曰湣王三十四年
田甲劫王薛文走

魏子所與粟賢者聞之乃上書

言孟嘗君不作亂請以身為盟遂自剄宮門以
明孟嘗君湣王乃驚而蹤跡驗問孟嘗君果無
反謀乃復召孟嘗君孟嘗君因謝病歸老於薛
湣王許之其後秦亡將呂禮相齊欲困蘇代代
乃謂孟嘗君曰周最於齊至厚也正義曰周最
周之公子而
齊王逐之而聽親弗親弗人姓名○索隱曰戰
國策作祝弗蓋祝為得之相呂
禮者欲取秦也齊秦合則親弗與呂禮重矣有
用齊秦必輕君君不如急北兵趨趙以和秦魏
收周最以厚行且反齊王之信索隱曰周最本厚
於齊今欲逐之而
相秦之亡將蘇代謂孟嘗令齊收周最以自厚
其行又且得反齊王之有信以不逐周最也

孟嘗君傳

又禁天下

之變

索隱曰變謂齊秦合則親弗呂禮用用則秦齊輕孟嘗也

齊無秦則天下集

齊親弗必走則齊王孰與爲其國也於是孟嘗君從其計而呂禮嫉害於孟嘗君孟嘗君懼乃遺秦相穰侯魏冉書曰吾聞秦欲以呂禮收齊齊天下之彊國也子必輕矣齊秦相取以臨三晉呂禮必并相矣是子通齊以重呂禮也若齊免於天下之兵其讎子必深矣子不如勸秦王伐齊齊破吾請以所得封子齊破秦畏晉之彊秦必重子以取晉晉國弊於齊而畏秦晉必重子以取秦是子破齊以爲功挾晉以爲重是子

破齊定封秦晉交重子若齊不破呂禮復用子
必大窮於是穰侯言於秦昭王伐齊而呂禮亡
後齊湣王滅宋益驕欲去孟嘗君孟嘗君恐乃
如魏魏昭王以爲相西合於秦趙與燕共伐破
齊齊湣王亡在莒遂死焉齊襄王立而孟嘗君
中立爲諸侯無所屬齊襄王新立畏孟嘗君與
連和復親薛文卒謚爲孟嘗君

皇覽曰孟嘗君
冢在魯國薛城

中向門東向門出北邊門也詩云居常與許鄭玄曰常或作
嘗在薛之南孟嘗邑于薛城○索隱曰孟嘗龍襄父封薛而號
曰孟嘗君此云謚非也孟字嘗邑各嘗邑在薛之旁○正義
曰括地志云孟嘗君墓在徐州滕縣五十二里卒在齊襄王
之時

諸子爭立而齊魏共滅薛孟嘗絕嗣無後

也初馮驩

音歡復作煖音許表反

聞孟嘗君好客躡蹻而見

之

索隱曰蹻音脚字亦作蹻又作僑

孟嘗君曰先生遠辱何以教

文也馮驩曰聞君好士以貧身歸於君孟嘗君

置傳舍早曰

索隱曰傳音逐緣反按傳舍幸舍及代舍並當上中下三等之客所舍之名耳

孟

嘗君問傳舍長曰客何所為荅曰馮先生甚貧

猶有一劍耳又蒯綈

蒯音苦怪反茅之類可為繩言其劍把無物可裝以小繩纏之也綈

音侯亦作候謂把劍之處○索隱曰蒯草名音蒯瞶之蒯綈謂把劍之物言其劍無物可裝但以蒯繩纏之故云蒯綈也

彈其劍而謠曰長鋏歸來乎食無魚孟嘗君遷

之幸舍食有魚矣五日又問傳舍長荅曰客復

彈劍而歌曰長鋏歸來乎出無輿孟嘗君遷之

史記卷一百一十五

代舍出入乘輿車矣五日孟嘗君復問傳舍長
舍長荅曰先生又嘗彈劍而歌曰長鋏歸來乎
無以爲家孟嘗君不悅居其年馮驩無所言孟
嘗君時相齊封萬戶於薛其食客三千人邑入
不足以奉客正義曰奉符用反使人出錢於薛歲餘不入
貸錢者多不能與其息索隱曰與猶還也息猶利也客奉將不
給孟嘗君憂之問左右何人可使收債於薛者
傳舍長曰代舍客馮公形容狀貌甚辯長者無
他伎亦作技能宜可令收債孟嘗君乃進馮驩而
請之曰賓客不知文不肖幸臨文者三千餘人

邑入不足以奉賓客故出息錢於薛薛歲不入
民頗不與其息今客食恐不給願先生責之馮
謹曰諾辭行至薛召取孟嘗君錢者皆會得息
錢十萬乃多釀酒買肥牛召諸取錢者能與息
者皆來不能與息者亦來皆持取錢之券書合
之齊爲會日殺牛置酒酒酣乃持券如前合之
能與息者與爲期貧不能與息者取其券而燒
之曰孟嘗君所以貸錢者爲民之無者以爲本
業也所以求息者爲無以奉客也今富給者以
要期貧窮者燔券書以捐之諸君彊飲食有君

如此豈可負哉坐者皆起再拜孟嘗君聞馮驩
燒券書怒而使使召驩驩至孟嘗君曰文食客
三千人故貸錢於薛文奉邑少索隱曰言文之奉邑少故令出自心於薛也
而民尚多不以時與其息客食恐不足故請先
生收責之聞先生得錢即的多具牛酒而燒券
書何馮驩曰然不多具牛酒即不能畢會無以
知其有餘不足有餘者爲要期不足者雖守而
責之十年息愈多急即以逃亡自捐之若急終
無以償上則爲君好利不愛士民下則有離上
抵負之名非所以厲士民彰君聲也焚無用虛

債之券捐不可得之虛計今薛民親君而彰君之善聲也君有何疑焉孟嘗君乃拊手而謝之齊王惑於秦楚之毀以爲孟嘗君名高其主而擅齊國之權遂廢孟嘗君諸客見孟嘗君廢皆去馮驩曰借臣車一束可以入秦者必令君重於國而奉邑益廣可乎孟嘗君乃約車幣而遣之馮驩乃西說秦王曰天下之游士馮軾結轡西入秦者無不欲彊秦而弱齊馮軾結轡東入齊者無不欲彊齊而弱秦此雄雌之國也勢不兩立爲雄雄者得天下矣秦王跽而問之曰何

以使秦無爲雌而可馮驩曰王亦知齊之廢孟嘗君乎秦王曰聞之馮驩曰使齊重於天下者孟嘗君也今齊王以毀廢之其心怨必背齊背齊入秦則齊國之情人事之誠盡委之秦齊地可得也豈直爲雄也君急使使載幣陰迎孟嘗君不可失時也如有齊覺悟復用孟嘗君則雌雄之所在未可知也秦王大悅乃遣車十乘黃金百鎰以迎孟嘗君馮驩辭以先行至齊說齊王曰天下之游士馮軾結鞶東入齊者無不欲彊齊而弱秦者馮軾結鞶西入秦者無不欲彊

秦而弱齊者夫秦齊雄雌之國秦彊則齊弱矣
此勢不兩雄今臣竊聞秦遣使車十乘載黃金
百鎰以迎孟嘗君孟嘗君不西則已西入相秦
則天下歸之秦爲雄而齊爲雌雌則臨淄即墨
危矣王何不先秦使之未到復孟嘗君而益與
之邑以謝之孟嘗君必喜而受之秦雖彊國豈
可以請人相而迎之哉折秦之謀而絕其霸彊
之略齊王曰善乃使人至境候秦使秦使車適
入齊境使還馳告之王召孟嘗君而復其相位
而與其故邑之地又益以千戶秦之使者聞孟

嘗君復相齊還車而去矣自齊王毀廢孟嘗君
諸客皆去後召而復之馮驩迎之未到孟嘗君
太息歎曰文常好客遇客無所敢失食客三千
有餘人先生所知也客見文一日發皆背文而
去莫顧文者今賴先生得復其位客亦有何面
目復見文乎如復見文者必唾其面而大辱之
馮驩結轡下拜孟嘗君下車接之曰先生爲客
謝乎馮驩曰非爲客謝也爲君之言失夫物有
必至事有固然君知之乎孟嘗君曰愚不知所
謂也曰生者必有死物之必至也富貴多士貧

賤寡友事之固然也君獨不見夫朝趨市者乎

索隱曰趨音娶趣向也又音趨

明旦側有爭門而入日暮之後過

市朝者掉臂而不顧

索隱曰過光卧反朝音潮市之非行列有如朝位因言市朝云耳

好朝而而惡暮所期物忘其中

索隱曰期物謂入市心中所期之物利人

平明側有爭門而入至日暮所期忘其中忘者無也其中市朝之中言日暮物盡故掉臂不顧也

今君失

位賓客皆去不足以怨士而徒絕賓客之路願

君遇客如故孟嘗君再拜曰敬從命矣聞先生

之言敢不奉教焉

太史公曰吾嘗過薛其俗閭里率多暴桀子弟

與鄒魯殊問其故曰孟嘗君招致天下任俠姦

人入薛中蓋六萬餘家矣世之傳孟嘗君好客
自喜名不虛矣

索隱述贊曰

靖郭之子 威王之孫 旣彊其國
實高其門 好客喜士 見重平原
雞鳴狗盜 魏子馮煖 如何承睫
薛縣徒存

孟嘗君列傳第十五

史記七十五

平原君虞卿列傳第十六 史記七十六

平原君趙勝者正義勝式謚反趙之諸公子也徐廣曰魏公子傳曰

惠文王弟諸子中勝最賢喜賓客賓客蓋至者數千

人平原君相趙惠文王及孝成王三去相三復

位封於東武城徐廣曰屬清河○正義曰今貝州武城縣也平原君家樓

臨民家民家有雙者擊散行汲散亦作跚○索隱曰上雙音辟散音先寒

反亦作跚音同平原君美人居樓上臨見大笑之

○正義雙跂也明日雙者至平原君門請曰臣聞君之喜士士

不遠千里而至者以君能貴士而賤妾也臣不

幸有罷癯之病徐廣曰癯音隆癯病也○索隱曰罷音皮癯音呂呂宮反罷罷癯有疾言腰曲而背

也 蔭高

而君之後宮臨而笑臣臣願得笑臣者頭
平原君笑應曰諾壁者去平原君笑曰觀此豎
子乃欲以一笑之故殺吾美人不亦甚乎終不
殺居歲餘賓客門下舍人稍稍引去者過半平
原君怪之曰勝所以待諸君者未嘗敢失禮而
去者何多也門下一人前對曰以君之不殺笑
壁者以君爲愛色而賤士士即去耳於是平原
君乃斬笑壁者美人頭自造門進壁者因謝焉
其後門下乃復稍稍來是時齊有孟嘗魏有信
陵楚有春申故爭相傾以待士

徐廣曰待一作得

秦之圍

邯鄲

正義曰趙惠文王九年秦昭王十五年

趙使平原君求救合從

於楚約與食客門下有勇力文武備具者二十人偕平原君曰使文能取勝則善矣文不能取勝則歛血於華屋之下必得定從而還士不外索取於食客門下足矣得十九人餘無可取者無以滿二十人門下有毛遂者前自贊於平原君曰遂聞君將合從於楚約與食客門下二十人偕不外索今少一人願君即以遂備員而行矣平原君曰先生處勝之門下幾年於此矣毛遂曰三年於此矣平原君曰夫賢士之處世也

壁若錐之剷囊中其末立見今先生剷勝之門
下三年於此矣左右未有所稱誦勝未有所聞
是先生無所有也先生不能先生留毛遂曰臣
乃今日請處囊中耳使遂蚤得剷囊中乃穎脫
而出索隱曰鄭玄曰穎脫也脫音吐活反非特其末見而已平原君
竟與毛遂偕十九人相與目笑之而未發也索隱曰發一作廢鄭云云比目視而輕笑之未能即廢棄之也毛遂比至楚與十九人論
議十九人皆服平原君與楚合從言其利害日出
而言之日中不決十九人謂毛遂曰先生上毛
遂按劍歷階而上謂平原君曰從之利害兩言

而決耳今日出而言從日中不決何也楚王謂平原君曰客何爲者也平原君曰是勝之舍人也楚王叱曰胡不下吾乃與而君言汝何爲者也毛遂按劍而前曰王之所以叱遂者以楚國之衆也今十步之內王不得恃楚國之衆也王之命懸於遂手吾君在前叱者何也且遂聞湯以七十里之地王天下文王以百里之壤而臣諸侯豈其士卒衆多哉誠能據其勢而奮其威今楚地方五千里持戟百萬此霸王之資也以楚之彊天下弗能當白起小豎子耳率數萬之

衆興師以與楚戰一戰而舉鄢郢再戰而燒夷陵三戰而辱王之先人此百世之怨而趙之所羞而王弗知惡焉正義曰惡鳥故反合從者爲楚非爲趙也吾君在前叱者何也楚王曰唯唯誠若先生之言謹奉社稷而以從毛遂曰從定乎楚王曰定矣毛遂謂楚王之左右曰取雞狗馬之血來索隱曰盟之所用牲貴賤不同天子用牛及馬諸侯以犬及緞大夫已下用雞今此物言盟之用血故云取雞狗馬之血耳毛遂奉銅盤索隱曰奉音捧若周禮則用珠盤也而跪進之楚王曰王當歃血而定從次者吾君次者遂遂定從於殿上毛遂左手持盤血而右手招十九人曰

公相與歃此血於堂下

索隱曰歃音所甲反

公等錄錄

音

○索隱曰音六王劭云錄借字耳又說文云錄錄隨從之貌也

所謂因人成事者也

平原君已定從而歸歸至於趙曰勝不敢復相士勝相士多者千人寡者百數自呂爲不失天下之士今乃於毛先生而失之也毛先生一至

楚而使趙重於九鼎大呂

索隱曰九鼎大呂國之寶器言毛遂至楚使趙重於

九鼎大呂謂爲天子所重也○正義曰大呂周廟大鍾

毛先生以三寸之舌彊

於百萬之師勝不敢復相士遂以爲上客平原君既返趙楚使春申君將兵赴救趙魏信陵君亦矯奪晉鄙軍往救趙皆未至秦急圍邯鄲邯

鄆急且降平原君其甚患之邯鄲傳舍吏子李同

正義曰名談太史公諱改也

說平原君曰君不憂趙亡邪平原

君曰趙亡則勝爲虜何爲不憂乎李同曰邯鄲之民炊骨易子而食可謂急矣而君之後宮百數婢妾被綺縠餘粱肉而民褐衣不完糟糠不厭民困兵盡或剡木爲矛矢而君器物鍾磬自若使秦破趙君安得有此使趙得全君何患無有今君誠能令夫人以下編於士卒之間分功而作家之所有盡散以饗士士方其危苦之時易德耳

正義曰言士方危苦之時易有恩德

於是平原君從之得

敢死之士三千人李同遂與三千人赴秦軍秦軍爲之却三十里亦會楚魏救至秦兵遂罷邯

鄲復存李同戰死封其父爲李侯

徐廣曰河內城
臯有李城○正

義曰懷州溫縣本李城也李同父
所封隋煬帝從故溫城移縣於此

虞卿欲以信陵君之

存邯鄲爲平原君請封公孫龍聞之夜駕見平

原君曰龍聞虞卿欲以信陵君之存邯鄲爲君

請封有之乎平原君曰然龍曰此甚不可且王

舉君而相趙者非以君之智能爲趙國無有也

割東武城而封君者非以君爲有功也而以國

人無勲乃以君爲親戚故也君受相印不辭無

能割地不言無功者亦自以爲親戚故也今信

陵君存邯鄲而請封是親戚受城而國人計功

也徐廣曰一本是親戚受城而以國許人此甚不可且虞卿操其兩權

事成操右券以責索隱曰言虞卿論平原君取封事成則操其右券以責其報德也事

不成以虛名德君君必勿聽也平原君遂不聽

虞卿平原君以趙孝成王十五年卒索隱曰六國年表及世家

並云十四年卒與此不同子孫代後竟與趙俱亡平原君厚待

公孫龍公孫龍善爲堅白之辯及鄒衍過趙索隱

曰過音戈言至道乃絀公孫龍劉向別錄曰齊使鄒衍過趙平原君見公孫龍及其

徒基母子之屬論白馬非馬之辯以問鄒子鄒子曰不可彼天下之辯有五勝三至而辭正爲下辯者別殊類使不相害

序異端使不相亂抒意通指明其所謂使人與知焉不務相迷也故勝者不失其所守不勝者得其所求若是故辯可爲也及至頌文以相假飾辭以相博巧譬以相移引人聲使不得及其意如此害大道夫繳紛爭言而競後息不能無害君子坐皆稱善○索隱曰抒音墅抒者舒也繳音糾謂繳繞紛亂爭言而竟後息不能無害也

虞卿者游說之士也躡蹻檐簪

徐廣曰蹻草履也簪長柄笠音登笠

有柄者謂之登索隱曰蹻音脚

說趙孝成王一見賜黃金百鎰白

璧一雙再見爲趙上卿故號爲虞卿

誰周曰食邑於虞○索隱

曰趙之虞在河東太陽縣今之虞鄉縣是也

秦趙戰於長平趙不勝亡一

都尉趙王召樓昌與虞卿曰軍戰不勝尉復死

徐廣曰復一作係

寡人使東甲而趨之何如樓昌曰無益

也不如發重使爲媾

古后反求和曰媾○索隱曰按媾亦講講亦和也

虞

卿曰昌言媾者以爲不媾軍必破也而制媾者在秦且王之論秦也欲破趙之軍乎不邪王曰秦不遺餘力矣必且欲破趙軍虞卿曰王聽臣發使出重寶以附楚魏楚魏欲得王之重寶必內吾使趙使入楚魏秦必疑天下之合從且必恐如此則媾乃可爲也趙王不聽與平陽君爲媾發鄭朱入秦秦內之趙王召虞卿曰寡人使平陽君爲媾於秦秦已內鄭朱矣卿以爲奚如虞卿對曰王不得媾軍必破矣天下賀戰勝者皆在秦矣鄭朱貴人也入秦秦王與應侯必顯

重以示天下楚魏以趙爲媾必不救王秦知天下不救王則媾不可得成也應侯果顯鄭朱以示天下賀戰勝者終不肯媾長平大敗遂圍邯鄲爲天下笑秦旣解邯鄲圍而趙王入朝使趙

郝

音釋徐廣曰一作赦

約事於秦割六縣而媾虞卿謂趙

王曰秦之攻王也倦而歸乎王以其力尙能進愛王而弗攻乎王曰秦之攻我也不遺餘力矣必以倦而歸也虞卿曰秦以其力攻其所不能取倦而歸王又以其力之所不能取以送之是助秦自攻也來年秦復攻王王無救矣王以虞

卿之言告趙郝趙郝曰虞卿誠能盡秦力之所
至乎誠知秦力之所不能進此彈丸之地弗予
今秦來年復攻王王得無割其內而媾乎王曰
請聽子割矣子能必使來年秦之不復攻我乎
趙郝對曰此非臣之所敢任也他日三晉之交
於秦相善也今秦善韓魏而攻王王之所以事
秦必不如韓魏也今臣爲足下解負親之攻索隱

曰爲足下解其負
檐而親自攻之也

開關通幣齊交韓魏至來年而

王獨取攻於秦此王之所以事秦必在韓魏之
後也此非臣之所敢任也王以告虞卿虞卿對

曰郝言不媾來年秦復攻王王得無割其內而媾乎今媾郝又以不能必秦之不復攻也今雖割六城何益來年復攻又割其力之所不能取而媾此自盡之術也不如無媾秦雖善攻不能取六縣趙雖不能守終不失六城秦倦而歸兵必罷我呂六城收天下以攻罷秦是我失之於天下而取償於秦也吾國尚利孰與坐而割地自弱以彊秦哉今郝曰秦善韓魏而攻趙者必以爲韓魏不救趙也而王之軍必孤有以王之

事秦不如韓魏也是使王歲以六城事秦也即

坐而城盡來年秦復求割地王將與之乎弗與
是棄前功而挑秦禍也與之則無地而給之語
曰彊者善攻弱者不能守今坐而聽秦秦兵不
弊而多得地是彊秦而弱趙也以益彊之秦而
割愈弱之趙其計故不止矣且王之地有盡而
秦之求無已以有盡之地而給無已之求其勢
必無趙矣趙王計未定樓緩從秦來趙王與樓
緩計之曰予秦地何如毋予孰吉緩辭讓曰此
非臣之所能知也王曰雖然試言公之私私謂私心也
樓緩對曰王亦聞夫公甫文伯母乎正義

私謂私心也

樓緩對曰王亦聞夫公甫文伯母乎

正義

曰季康子從祖母文伯名穀康子從父昆弟

公甫文伯仕於魯病死女子

爲自殺於房中者二人其母聞之弗哭也其相

室曰

正義曰謂傳姆之類也

焉有子死而弗哭者乎其母

曰孔子賢人也遂於魯而是人不隨也今死而

婦人爲之自殺者二人若是者必其於長者薄

而於婦人厚也故從母三言之是爲賢母從妻三

之是必不免爲妬妻故其言一也三言者異則人

心變矣今臣新從秦來而言勿予則非計也言

予之恐王以臣爲爲秦也故不敢對使臣得爲

大王計不如予之王曰諾虞卿聞之入見王曰

此飾說也王脊

徐廣曰音慎

勿予樓緩聞之往見王

王又以虞卿之言告樓緩樓緩對曰不然虞卿得其一不得其二夫秦趙構難而天下皆說何也曰吾且因彊而乘弱矣今趙兵困於秦天下之賀戰勝者則必盡在於秦矣故不如亟割地爲和以疑天下而慰秦之心不然天下將因秦之彊怒乘趙之弊瓜分之趙且云何秦之圖乎故曰虞卿得其一不得其二願王以此決之勿復計也虞卿聞之往見王曰危哉樓子之所以爲秦者是愈疑天下而何慰秦之心哉獨不言

其示天下弱乎且臣言勿予者非固勿予而已也秦索六城於王而王以六城賂齊齊秦之深讎也得王之六城并力西擊秦齊之聽王不待辭之畢也則是王失之於齊而取償於秦也而齊趙之深讎可以報矣而示天下有能爲也王以此發聲兵未窺於境臣見秦之重賂至趙而反媾於王也從秦爲媾韓魏聞之必盡重王重王必出重寶以先於王則是王一舉而結三國之親而與秦易道也

正義曰前取秦攻今得賂是易道也易音亦

趙王曰

善則使虞卿東見齊王與之謀秦虞卿未返秦

使者已在趙矣樓緩聞之亡去趙於是封虞卿
以一城居頃之而魏請爲從趙孝成王召虞卿
謀過平原君索隱曰過音戈平原君曰願卿之論從也
虞卿入見王王曰魏請爲從對曰魏過光目反王
曰寡人固未之許對曰王過王曰魏請從卿曰
魏過寡人未之許又曰寡人過然則從終不可
乎對曰臣聞小國之與大國從事也有利則大
國受其福有敗則小國受其禍今魏臣小國請
其禍而王以大國辭其福臣故曰王過魏亦過
竊臣爲從便王曰善乃合魏爲從虞卿旣以魏

齊之故不重萬戶侯卿相之印與魏齊間行卒

去趙困於梁魏齊已死不得意乃著書索隱曰魏齊魏

相與應侯有仇秦求之急乃抵虞卿卿奔相印乃與齊間行亡歸梁以託信陵君信陵君疑未決齊自殺故虞卿失相乃

窮愁而著書也上採春秋下觀近世曰節義稱號揣摩政

謀凡八篇以刺譏國家得失世傳之曰虞氏春

秋正義曰藝文志云十五篇

太史公曰平原君翩翩濁世之佳公子也然未

睹大體鄙語曰利令智昏平原君貪馮亭邪說

使趙陷長平兵四十餘萬衆邯鄲幾亡譙周曰長平之

陷乃趙王信間易將之各何怨平原受馮亭哉虞卿料事揣情為趙畫策

何其工也及不忍魏齊卒困於大梁庸夫且知其不可況賢人乎然虞卿非窮愁亦不能著書以自見於後世云

索隱述贊曰

翩翩公子

天下奇器

笑姬從戮

義士增氣

兵解李同

盟定毛遂

虞卿躡蹻

受賞料事

乃困魏齊

著書見意

平原君虞卿列傳第十六

史記七十六

信陵君列傳第十七

史記七十七

魏公子無忌者魏昭王少子而魏安釐王異母弟也昭王薨安釐王即位封公子爲信陵君

白地理志無信陵或曰是鄉邑名

是時范雎亡魏相秦以怨魏齊

故秦兵圍大梁破魏華陽下軍走芒卯魏王及

公子患之公子爲人仁而下士士無賢不肖皆

謙而禮交之不敢以其富貴驕士士以此方數

千里爭往歸之致食客三千人當是時諸侯以

公子賢多客不敢加兵謀魏十餘年公子與魏

王博而北境傳舉烽言趙寇至且入界

文穎曰作高士擣槽

上作桔槔桔槔頭兜零以薪置其中謂魏王釋博欲召
之烽常低之有寇即火然舉之以相告

大臣謀公子止王曰趙王田獵耳非爲寇也正義

曰爲于復博如故王恐心不在博居頃復從北方

來傳言曰趙王獵耳非爲寇也魏王大驚曰公

子何以知之公子曰臣之客有能探得趙王陰

事者趙王所爲客輒以報臣臣以此知之是後

魏王畏公子之賢能不敢任公子以國政魏有

隱士曰侯嬴索隱曰音盈又曹植音音嬴瘦之嬴年七十家貧爲大

梁夷門監者公子聞之往請欲厚遺之不肯受

曰臣脩身絜行數十年終不以監門困故而受

公子財公子於是乃置酒大會賓客坐定公子
從車騎虛左自迎夷門侯生侯生攝敝衣冠直
上載公子上坐不讓欲以觀公子公子執轡愈
恭侯生又謂公子曰臣有客在市屠中願枉車
騎過之公子引車入市侯生下見其客朱亥俾

倪

素隱曰俾音蒲計反倪音五計反鄒誕生俾
音疋未反倪音五弟反○正義曰不正視也

故久立與

其客語微察公子公子顏色愈和當是時魏將
相宗室賓客滿堂待公子舉酒市人皆觀公子
執轡從騎皆竊罵侯生侯生視公子色終不變
乃謝客就車至家公子引侯生坐上坐偏贊賓

出六十一

索隱曰：編音遍，贊告也。謂以侯生編告賓客。

賓客皆驚，酒酣，公子起。

爲壽。侯生前，侯生因謂公子曰：「今日嬴之爲公

子亦足矣。」

徐廣曰：爲一作羞。

嬴乃夷門抱關者也，而公子

親枉車騎，自迎嬴於衆人廣坐之中，不宜有所

過。今公子故過之，然嬴欲就公子之名，故久立

公子車騎市中，過客以觀公子。公子愈恭。市人

皆以嬴爲小人，而以公子爲長者能下士也。於

是罷酒，侯生遂爲上客。侯生謂公子曰：「臣所過

屠者朱亥，此子賢者，世莫能知，故隱屠間耳。公

子往數請之，朱亥故不復謝公子。怪之。魏安釐

王二十年秦昭王已破趙長平軍又進兵圍邯

鄲公子姊爲趙惠文王弟平原君夫人數遺魏

王及公子書請救於魏魏王使將軍晉鄙

索隱曰魏

將姓將十萬衆救趙秦王使使者告魏王曰吾

攻趙日暮且下而諸侯敢救者已拔趙必移兵

先擊之魏王恐使人止晉鄙留軍壁鄴名爲救

趙實持兩端以觀望平原君使者冠蓋相屬於

魏讓魏公子曰勝所以自附爲婚姻者以公子

之高義爲能急人之困今邯鄲日暮降秦而魏

救不至安在公子能急人之困也且公子縱輕

勝棄之降秦獨不憐公子姊邪公子患之數請
魏王及賓客辯士說王萬端魏王畏秦終不聽
公子公子自度終不能得之於王計不獨生而
令趙亡乃請賓客約車騎百餘乘欲以客往赴
秦軍與趙俱死行過夷門見侯生具告所以欲
死秦軍狀辭決而行侯生曰公子勉之矣老臣
不能從公子行數里心不快曰吾所以待侯生
者備矣天下莫不聞今吾且死而侯生曾無一
言半辭送我我豈有所失哉復引車還問侯生
侯生笑曰臣固知公子之還也曰公子喜士名

聞天下今有難無他端而欲赴秦軍譬君以肉
投餒虎何功之有哉尚安事客然公子遇臣厚
公子往而臣不送以是知公子恨之復返也公
子再拜因問疾生乃屏人間語素隱曰間音
閑謂靜語也曰嬴

聞晉鄙之兵符常在王卧内而如姬最幸出入

王卧内力能竊之嬴聞如姬父爲人所殺如姬

資之三年素隱曰舊解資之三年謂服齊衰也今按亦具者
玄帝也謂欲爲父復讎之資畜於心已得三年也

自王以下欲求報其父仇莫能得如姬爲公子

泣公子使客斬其仇頭敬進如姬如姬之欲爲

公子死無所辭顧未有路耳公子誠一開口請

如姬如姬必許諾則得虎符奪晉鄙軍北救趙而西却秦此五霸之伐也公子從其計請如姬如姬果盜晉鄙兵符與公子公子行侯生曰將在外主令有所不受以便國家公子即合符而晉鄙不授公子兵而復請之事必危矣臣客屠者朱亥可與俱此人力士晉鄙聽大善不聽可使擊之於是公子泣侯生曰公子畏死耶何泣也公子曰晉鄙嘯嘯上音烏百反下音莊白反○索隱曰嘯謂多詞句也○正義曰聲宿將往恐不聽必當殺之是呂泣耳豈

類云嘯大笑啞大呼

鼓刀屠者而公子親數餼存之所以不報謝者以爲小禮無所用今公子有急此乃臣效命之秋也遂與公子俱公子過謝侯生侯生曰臣宜從老不能請數公子行日以至晉鄙軍之日北鄉自剄以送公子公子遂行至鄴矯魏王令代晉鄙晉鄙合符疑之舉手視公子曰今吾擁十萬之衆屯於境上國之重任今單車來代之何如哉欲無聽朱亥袖四十斤鐵椎椎殺晉鄙公子遂將晉鄙軍勒兵下令軍中曰父子俱在軍中父歸兄弟俱在軍中兄歸獨子無兄弟歸養得

選兵八萬人進兵擊秦軍秦軍解去遂救邯鄲
存趙趙王及平原君自迎公子於界平原君負

轡矢

呂忱曰轡盛弩矢○索隱曰轡音蘭謂以盛
矢如今之胡簾而短也呂姓忱名作字林者爲公

子先引趙王再拜曰自古賢人未有及公子者
也當此之時平原君不敢自比於人公孫與侯
生決至軍侯生果北鄉自剄魏王怒公子之盜
其兵符矯殺晉鄙公子亦自知也已却秦存趙
使將將其軍歸魏而公子獨與客留趙趙孝成
王德公子之矯奪晉鄙兵而存趙乃與平原君
計巨五城封公子公子聞之意驕矜而有自功

之色客有說公子曰物有不可忘或有不可不
忘夫人有德於公子公子不可忘也公子有德
於人願公子忘之也且矯魏王令奪晉鄙兵以
救趙於趙則有功矣於魏則未爲忠臣也公子
乃自驕而功之竊爲公子不取也於是公子立
自責似若無所容者趙王埽除自迎執主人之
禮引公子就西階公子側行辭讓從東階上禮記
曰主人就東階客就西階
客若降等則就主人之階自言臯過以負於魏索隱曰負
音無功於趙趙王侍酒至暮口不忍獻五城以
公子退讓也公子竟留趙趙王以鄙爲公子湯

沐邑

索隱曰鄔音霍趙邑名屬常山

魏亦復以信陵奉公子公子

留趙公子聞趙有處士毛公藏於博徒薛公藏

於賣漿家

徐廣曰漿或作膠○索隱曰徐按別錄云也

公子欲見兩人

兩人自匿不肯見公子公子聞所在乃間步往

從此兩人游甚歡平原君聞之謂其夫人曰始

吾聞夫人弟公子天下無雙今吾聞之乃妾從

博徒賣漿者游公子妾人耳夫人以告公子公

子乃謝夫人去曰始吾聞平原君賢故負魏王

而救趙以稱平原君平原君之游徒豪舉耳

索隱

曰謂豪者舉之舉亦音據也

不求士也無忌自在大梁時常聞

此兩人賢至趙恐不得見以無已從之游尚恐其不我欲也今平原君乃以爲羞其不足從游乃裝爲去夫人具以語平原君平原君乃免冠謝固留公子平原君門下聞之半去平原君歸公子天下士復往歸公子公子傾平原君客公子留趙十年不歸秦聞公子在趙日夜出兵東伐魏魏王患之使使往請公子公子恐其怒之乃誠門下有敢爲魏王使通者死賓客皆背魏之趙莫敢勸公子歸毛公薛公兩人

索隱曰史失其名

往

見公子曰公子所以重於趙名聞諸侯者徒以

有魏也今秦攻魏魏急而公子不恤使秦破大
梁而夷先王之宗廟公子當何面目立天下乎
語未及卒公子立變色告車趣駕歸救魏魏王
見公子相與泣而以上將軍印授公子公子遂
將魏安釐王三十年公子使使遍告諸侯諸侯
聞公子將各遣將將兵救魏公子率五國之兵
破秦軍於河外走蒙驁遂乘勝逐秦軍至函谷
關抑秦兵索隱曰抑音憶謂以兵威足之秦兵不敢出當是時公
子威振天下諸侯之客進兵法公子皆名之故
世俗稱魏公子兵法

劉歆七略有魏公子兵法二十一
篇圖七卷○索隱曰公子所得進

兵法而必稱其名以言其然也

秦王患之乃行金萬斤於魏求晉

鄙客令毀公子於魏王曰公子亡在外十年矣今爲魏將諸侯將皆屬諸侯徒聞魏公子不聞魏王公子亦欲因此時定南面而王諸侯畏公子之威方欲共立之秦數使反間僞賀公子得立爲魏王未也魏王日聞其毀不能不信後果使人代公子將公子自知再以毀廢乃謝病不朝與賓客爲長夜飲飲醇酒多近婦女日夜爲樂飲者四歲竟病酒而卒其歲魏安釐王亦薨秦聞公子死使蒙驁攻魏拔二十城初置東郡

其後秦稍蠶食魏十八歲而虜魏王屠大梁

索隱

曰魏王名假

高祖始微少時數聞公子賢及即天子位

每過大梁常祠公子高祖十二年從擊黥布還
爲公子置守冢五家世世歲以四時奉祠公子
太史公曰吾過大梁之墟求問其所謂夷門夷
門者城之東門也天下諸公子亦有喜士者矣
然信陵君之接巖穴隱者不恥下交有以也名
冠諸侯不虛耳高祖每過之而今民奉祠不絕
也

索隱述贊曰

信陵下士 鄰國相傾 以公子故
不敢加兵 頗知朱亥 盡禮侯嬴
逐却晉鄙 終辭趙城 毛薛見重
萬古希聲

信陵君列傳第十七

史記七十七

信陵君傳

春申君列傳第十八

史記七十八

春申君者楚人也名歇姓黃氏游學博聞事楚

頃襄王

索隱曰名橫考
列王完之父

頃襄王以歇爲辯使於秦

秦昭王使白起攻韓魏敗之於華陽禽魏將芒
卯韓魏服而事秦秦昭王方令白起與韓魏共
伐楚未行而楚使黃歇適至於秦聞秦之計當
是之時秦已前使白起攻楚取巫黔中之郡拔
鄢郢東至竟陵

正義曰竟陵
屬江夏郡也

楚頃襄王東徙治於

陳縣

正義曰今
陳州也

黃歇見楚懷王之爲秦所誘而

入朝遂見歇留死於秦頃襄王其子也秦輕之

恐壹舉兵而滅楚歇乃上書說秦昭王曰天下

莫彊於秦楚今聞大王欲伐楚此猶兩虎相與

鬪兩虎相與鬪而驚犬受其弊索隱曰謂兩虎鬪乃受弊於驚犬劉

氏云受猶承也不如善楚臣請言其說臣聞物至則反

冬夏是也正義曰至極也極則反也冬至陰之極夏至陽之極致至則危徐廣曰至

或作安累綦是也今大國之地徧天下有其二垂

正義曰言極東西此從生民已來萬乘之地未嘗有也先

帝文王莊王之身三世不忘接地於齊以絕從

親之要索隱曰音腰以言山東從韓魏是其要今王使盛橋守事於

韓索隱曰秦使盛橋守事於韓亦如楚使召滑相趙然也並內行章義之難盛橋以其地

入秦是王不用甲不信威

索隱曰信音申

而得百里之

地王可謂能矣王又舉甲而攻魏杜大梁之門

舉河內拔燕酸棗虛

徐廣曰秦始皇五年取酸棗燕虛蘇代曰决宿胥之口魏無虛

頓桃

徐廣曰燕丘縣有桃城

入邢

徐廣曰平臯有邢丘○正義曰邢丘在懷州武德縣東南二十里

之兵雲翔而不敢掇王之功亦多矣王休甲息

衆二年而後復之又并蒲衍首垣

徐廣曰蘇秦云北有河外卷衍

長垣縣有蒲鄉○索隱曰此蒲在衛之長垣蒲鄉也衍在河南與卷近首蓋牛首垣即長垣非河東之垣也垣音圓

臨仁平丘

徐廣曰屬陳留○索隱曰仁及平丘二縣名謂以兵臨此二縣則黃及濟陽等自嬰城而守也

地理志平丘縣屬陳留仁闕

黃濟陽嬰城

徐廣曰蘇代云决白馬之口魏無黃濟陽○正義曰

故黃城在曹州考城縣東濟陽故城在曹州宛句縣西南嬰城未詳

而魏氏服王又割濮

磨之北

徐廣曰濮水北於鉅野入濟○索隱曰地名近濮

注齊秦之要絕楚

趙之脊

正義曰劉伯莊云言秦得魏地楚趙之絕從

天下五合六聚而不

敢救王之威亦單矣

徐廣曰單亦作殫○索隱曰按單音丹單盡也言王之威盡行

也王若能持功守威絀攻取之心而肥仁義之

地使無後患三王不足四五伯不足六也王若

負人徒之衆仗兵革之彊乘毀魏之威而欲以

力臣天下之主臣恐其有後患也詩曰靡不有

初鮮克有終易曰狐涉水濡其尾

正義曰言狐惜其尾每涉水舉

尾不令濕此至極困則濡之譬不可力臣之

此言始之易終之難也何以

知其然也昔智氏見伐趙之利而不知榆次之

禍

索隱曰智伯敗於榆次也地理志屬太原有梗陽鄉是也○正義曰榆次并州縣也注水經云榆次縣南同過水側

有鑿臺

吳見伐齊之便而不知干隧之敗

索隱曰干隧吳之敗

處地名干水邊也隧道路也○正義曰干隧吳地名也出萬安山西南一里太湖即吳王夫差自到處在蘇州西北四十

里此二國者非無大功也沒利於前而易患於

後也

索隱曰謂智伯及吳王沒伐趙及伐齊之利於前而易其患於後後即榆次干隧之難也

吳之

信越也從而伐齊

索隱曰從音絕用反劉氏云從猶領也

既勝齊人於

艾陵

正義曰艾山在兗州博縣南六十里也

還為越王禽三渚之浦

戰國策曰三江之浦○正義曰吳俗傳云越軍得子胥夢從東入伐吳越王即從三江北岸立壇殺白馬祭子胥極動酒盡乃

開渠由三浦入破吳王於姑蘇敗干隧也

智氏之信韓魏也從而伐趙攻

晉陽城

正義曰并州城

勝有日矣韓魏叛之殺智伯瑤於

鑿臺之下

徐廣曰鑿臺在榆次

今王妬楚之不毀也而忘毀

楚之彊韓魏也臣爲王慮而不取也詩曰大武

遠宅而不涉

正義曰言大軍不遠跋涉攻伐

從此觀之楚國援也

鄰國敵也詩云趯趯毚兔遇犬獲之

韓嬰章句曰趯趯往

來貌獲得也言趯趯之兔謂狡兔數往來逃匿其跡有時遇犬得之毛傳曰毚兔狡兔也鄭玄曰遇犬犬之馴者謂田

犬。索隱曰趯天歷反毚音讒

他人有心余忖度之今王中道而

信韓魏之善王也此正吳之信越也臣聞之敵

不可假時不可失臣恐韓魏卑辭除患而實欲

欺大國也

索隱曰大國謂秦也

何則王無重世之德於韓

魏而有累世之怨焉

索隱曰重世猶再世也

夫韓魏父子

兄弟接踵而死於秦者將十世矣本國殘社稷

壞宗廟毀剝腹絕腸折頸摺頤

徐黃曰一作顛○索隱曰摺音拉頤音夷

首身分離暴骸骨於草澤頭顱僵仆相望於境
父子老弱係脰束手爲羣虜者相及於路鬼
神孤傷無所血食人民不聊生族類離散流亡
爲僕妾者盈滿海內矣故韓魏之不亡秦社稷
之憂也今王資之與攻楚不亦過乎且王攻楚
將惡出兵正義曰惡音烏王將借路於仇讎之韓魏乎
兵出之日而王憂其不返也是王以兵資於仇
讎之韓魏也王若不惜路於仇讎之韓魏必攻

隨水右壤隨水右壤此皆廣川大水山林谿谷

不食之地也索隱曰楚都陳隨水之右壤蓋在隨之西今鄧州之西其地多山林者是王雖

有之不爲得地是王有毀楚之名而無得地之

實也且王攻楚之日四國必悉起兵以應王秦

楚之兵構而不離魏氏將出而攻留方與銍湖

陵碭蕭相故宋必盡正義曰徐州西宋州東兗州南並故宋地齊人南

面攻楚泗上必舉正義曰此時徐泗屬齊也此皆平原四達膏

腴之地而使獨攻索隱曰若秦楚構兵不休則魏盡故宋齊取泗上是使齊

魏獨攻伐而得其利者也王破楚以肥韓魏於中國而勁

齊韓魏之彊足以校於秦索隱曰校音教謂足以與秦爲敵也一云校者報也

春申君傳

言力能報秦

齊南以泗水爲境東負海北倚河而無

後患天下之國莫彊於齊魏齊魏得地葆利而詳事下吏一年之後爲帝未能其於楚王之爲帝

有餘矣

索隱曰言齊一年之後未即能爲帝而能禁秦爲帝有餘力矣然禁字作楚者誤也

夫以

王壤土之博人徒之衆兵革之彊宜舉事而樹

怨於楚遲令韓魏歸帝重於齊是王失計也

徐廣

曰遲一作還○索隱曰遲音值猶乃也令音力呈反韓魏重齊令歸帝號此秦之計失也

臣爲王慮

莫若善楚秦楚合而爲一以臨韓韓必斂手王施以東山之險帶以曲河之利韓必爲關內之侯若是而王以十萬戍鄭梁氏寒心許鄢陵嬰

城而上蔡召陵不往來也如此而魏亦關內侯

矣王壹善楚而關內兩萬乘之主注地於齊索隱

曰注謂以兵裁之齊右壤可拱手而取也正義曰右壤謂渭州之南北也王之

地一經兩海索隱曰西海至東海皆是秦地正義曰廣言橫度中國東西也要約天下

是燕趙無齊楚齊楚無燕趙也然後危動燕趙

直搖齊楚此四國者不待痛而服矣昭王曰善

於是乃止白起而謝韓魏發使賂楚約為與國

黃歇受約歸楚楚使歇與太子完入質於秦秦

留之數年楚頃襄王病太子不得歸而楚太子

與秦相應侯善於是黃歇乃說應侯曰相國誠

善楚太子乎應侯曰然歇曰今楚王恐不起疾
秦不如歸其太子太子得立其事秦必重而德
相國無窮是親與國而得儲萬乘也若不歸則
咸陽一布衣耳楚更立太子必不事秦夫失與
國而絕萬乘之和非計也願相國孰慮之應侯
以聞秦王秦王曰令楚太子之傅先往問楚王
之疾返而後圖之黃歇爲楚太子計曰秦之留
太子也欲以求利也今太子力未能有以利秦
也歇憂之甚而陽文君子二人在中王若卒大
命太子不在陽文君子必立爲後太子不得奉

宗廟矣不如亡秦與使者俱出臣請止以死當
之楚太子因變衣服爲楚使者御以出關而黃
歇守舍常爲謝病度太子已遠秦不能追歇乃
自言秦昭王曰楚太子已歸出遠矣歇當死願
賜死昭王大怒欲聽其自殺也應侯曰歇爲人
臣出身以徇其主太子立必用歇故不如無罪
而歸之以親楚秦因遣黃歇歇至楚三月楚頃
襄王卒徐廣曰三十
十六年太子完立是爲考烈王考烈王
元年以黃歇爲相封爲春申君正義曰然四君封邑
地又非趙境並蓋
號謚而孟嘗具謚賜淮北地十二縣後十五歲黃

歇言之楚王曰淮北地邊齊其事急請以爲郡

便因并獻淮北十二縣請封於江東考烈王許

之春申君因城故吳墟

正義曰虛音墟闔閭今蘇州也於城內小城西北別築城

居之今圯毀也又大內北瀆四從五橫至今猶存又攻破楚門爲昌門以自爲都邑春申

君既相楚是時齊有孟嘗君趙有平原君魏有

信陵君方爭下士招致賓客以相傾奪輔國持

權春申君爲楚相四年秦破趙之長平軍四十

餘萬五年圍邯鄲邯鄲告急於楚楚使春申君

將兵往救之秦兵亦去春申君歸春申君相楚

八年爲楚北伐滅魯

索隱曰年表云八年取魯封魯君於莒十四年滅也

以荀

卿爲蘭陵令當是時楚復彊趙平原君使人於
春申君春申君舍之於上舍趙使欲夸楚爲璫
瑁簪刀劒室以珠玉飾之請命春申君客春申
君客三千餘人其上客皆躡珠履以見趙使趙
使大慙春申君相十四年秦莊襄王立以呂不
韋爲相封爲文信侯取東周春申君相二十二
年諸侯患秦攻伐無已時乃相與合從西伐秦
徐廣曰始皇六年而楚王爲從長春申君用事至函谷關
秦出兵攻諸侯兵皆敗走楚考烈王以咎春申
君春申君以此益踈客有觀津人朱英

正義曰
觀音館

今魏州觀城縣也

謂春申君曰人皆以楚爲彊而君用之

弱其於英不然先君時善秦二十年而不攻楚

何也秦踰黽隘之塞

正義曰黽隘之塞在申州黽音盲也

而攻楚不便

假道於兩周背韓魏而攻楚不可今則不然魏

旦暮亡不能愛許鄢陵其許魏割以與秦秦兵

去陳百六十里

徐廣曰在許東南

臣之所觀者見秦楚之

日鬪也楚於是去陳徙壽春而秦徙衛野王作

置東郡

正義曰濮滑州兼河北置東郡濮州本衛都而徙野王也

春申君由此就

封於吳行相事楚考烈王無子春申君患之求

婦人宜子者進之甚衆卒無子趙人李園持其

女弟欲進之楚王聞其不宜子恐久毋寵李園
求事春申君爲舍人已而謁歸故失期還謁春
申君問之狀對曰齊王使使求臣之女弟與其
使者飲故失期春申君曰娉入乎對曰未也
春申君曰可得見乎曰可於是李園乃進其
女弟即幸於春申君知其有身李園乃與其女
弟謀園女弟承間以說春申君曰楚王之貴幸
君雖兄弟不如也今君相楚二十餘年而王無
子即百歲後將更立兄弟則楚更立君後亦各
貴其故所親君又安得長有寵乎非徒然也君

實用事以多失禮於王兄弟兄弟誠立禍且及身何以保相印江東之封乎今妾自知有身矣而人莫知妾幸君未以誠以君之重而進妾於楚王王必幸妾妾賴天有子男則是君之子爲王也楚國盡可得孰與身臨不測之罪乎春申君大然之乃出李園女弟謹舍而言之楚王楚王召入幸之遂生子男立爲太子以李園女弟爲王后楚王貴李園園用事李園旣入其女弟立爲王后子爲太子恐春申君語泄而益驕陰養死士欲殺春申君以滅口而國人頗有知之

者春申君相二十五年楚考烈王病朱英謂春

申君曰世有母望之福正義曰无望猶不望而忽至又有母望

之禍索隱曰周易有无妄卦其義殊也今君處母望之世正義曰謂生死无常

事母望之主正義曰謂喜怒不節也安可以無母望之人乎

正義曰謂吉凶忽爲春申君曰何謂母望之福曰君相楚二

十餘年矣雖名相國實楚王也今楚王病旦暮

且卒而君相少主因而代立當國如伊尹周公

王長而反政不即遂南面稱孤而有楚國此所

謂母望之福也春申君曰何謂母望之禍曰李

園不治國而君之仇也索隱曰言園是春申之仇也戰國策作君之舅謂爲王之

春申君傳

舅意

不爲兵而養死士之日久矣楚王卒李園必

先入據權而殺君以滅口此所謂毋望之禍也

春申君曰何謂毋望之人對曰君置臣郎中楚

王卒李園必先入臣爲君殺李園此所謂毋望

之人也春申君曰足下置之李園弱人也僕又

善之且又何至此朱英知言不用恐禍及身乃

亡去後十七日楚考烈王卒李園果先入伏死

士於棘門之內

正義曰壽州城門

春申君入棘門園死

士俠刺春申君斬其頭投之棘門外

正義曰楚考烈王二十五年

年秦始皇九年

於是遂使吏盡滅春申君之家而李園

女弟初幸春申君有身而入之王所生子者遂

立是爲楚幽王

索隱曰按楚捍有母弟猶猶有庶兄負芻及昌平君是楚君完非無子而上文

云考列王無子誤也

是歲也秦始皇帝立九年矣嫪毐亦爲

亂於秦覺夷其三族而呂不韋廢

太史公曰吾適楚觀春申君故城宮室盛矣哉

初春申君之說秦昭王及出身遣太子歸何其

智之明也後制於李園旄矣

徐廣曰旄音耄

語曰當斷

不斷反受其亂春申君失朱英之謂邪

索隱述贊曰

黃歇辯智 權略秦楚 太子獲歸

身作宰輔

珠炫趙客

邑開吳土

烈王寡胤

李園獻女

無妄成災

朱英徒語

春申君列傳第十八

史記七十八

范雎蔡澤列傳第十九

史記七十九

范雎者魏人也字叔游說諸侯欲事魏王家貧

無以自資乃先事魏中大夫須賈

索隱曰漢書百官表中大夫秦

官此魏有中大夫蓋古官也姓須名賈蓋密須氏之後

須賈爲魏昭王使於齊

索隱曰世本昭王名遯襄王之子

范雎從留數月未得報齊襄王

聞雎辯口

索隱曰襄王名法章

乃使人賜雎金十斤及牛酒

雎辭謝不敢受須賈知之大怒以爲雎持魏國

陰事告齊故得此饋令雎受其牛酒還其金既

歸心怒雎以告魏相魏相魏之諸公子曰魏齊

魏齊大怒使舍人笞擊雎折脅搯齒

索隱曰搯音力各反謂打

折其脅而又

睢佯死即卷以簀

索隱曰簀謂葦秋之薄也用以裹其屍也

置廁中賓客飲者醉更溺睢

索隱曰更音羹溺即溲也溺音年吊反溲音所

留反○正義曰溺古尿字

故僇辱以懲後令無妄言者睢從簀

中謂守者曰公能出我我必厚謝公守者乃請

出棄簀中死人魏齊醉曰可矣范睢得出後魏齊

悔復召求之魏人鄭安平聞之乃遂操范睢亡

伏匿更名姓曰張祿當此時秦昭王使謁者王

稽於魏鄭安平詐爲卒侍王稽

正義卒祖忽反

王稽問

魏有賢人可與俱西游者乎鄭安平曰臣里中

有張祿先生欲見君言天下事其人有仇不敢

晝見王稽曰夜與俱來鄭安平夜與張祿見王

稽語未究王稽知范雎賢謂曰先生待我於三

亭之南

索隱曰三亭亭名在魏境之邊道亭也今無其處一云魏之郊境摠有三亭皆祖餞之處如今與期

三亭之南蓋送餞已畢無人之處所也。正義曰括地志云三亭岡在汴州尉氏縣西南三十七里按三亭岡在山部中名也蓋岡亭誤爲南與私約而去王稽辭魏去過載范雎入

秦至湖關

索隱曰地理志京北有湖縣本名胡武帝更名湖即今湖城也。正義曰今號州湖城縣

也

望見車騎從西來范雎曰彼來者爲誰王稽

曰秦相穰侯東行縣邑范雎曰吾聞穰侯專秦

權惡內諸侯客

索隱曰內音納亦如字內猶入也

此恐辱我我寧

且匿車中有頃穰侯果至勞王稽因立車而語

曰關東有何變曰無有又謂王稽曰謁君得無與諸侯客子俱來乎無益徒亂人國耳王稽曰不敢即別去范雎曰吾聞穰侯智士也其見事遲鄉者疑車中有人忘索之索隱曰索搜也先格反於是范雎下車走曰此必悔之行十餘里果使騎還索車中無客乃已王稽遂與范雎入咸陽已報使因言曰魏有張祿先生天下辯士也曰秦王之國危於累卵正義曰說苑云晉靈公造九屬臺費千金謂左右曰敢有諫者斬荀息聞之上書求見靈公張弩持矢見之曰臣不敢諫也呂能累十二博其加九雞子其上公曰子爲寡人作之荀息正顏色定志意以棊子置下加九雞子其上左右懼懼荀息靈公氣息不續公曰危哉危哉荀息曰不危也復有危於此者公曰願見之荀息

曰九層之臺三年不成男不耕女不織國用空虛隣國謀議將興社稷亡滅君欲何望靈公曰寡人之過也乃至於此即壞九層臺也

得臣則安然不可以書傳也臣故載來

秦王弗信使舍食草具

索隱曰謂亦舍之而食以下客之具然草具謂鹿食草柔

之饌具也

待命歲餘當是時昭王已立三十六年南

拔楚之鄢郢楚懷王幽死於秦秦東破齊湣王

常稱帝後去之數困三晉猷天下辯士無所信

穰侯華陽君

徐廣曰華一作華○索隱曰穰侯謂冉宣太后之異父弟穰縣在南陽華陽君子戎

宣太后之同父弟亦號為新城君是也

昭王母宣太后之弟也而涇陽

君高陵君皆昭王同母弟也穰侯相三人者更

將有封邑以太后故私家富重於王室及穰侯

爲秦將且欲越韓魏而伐齊綱壽欲以廣其陶

封范雎乃上書曰臣聞明主立政

索隱曰戰國策立作位

有

功者不得不賞有能者不得不官勞大者其祿
厚功多者其爵尊能治衆者其官大故無能者
不敢當職焉有能者亦不得蔽隱使以臣之言
爲可願行而益利其道以臣之言爲不可久留
臣無爲也語曰庸主賞所愛而罰所惡明主則
不然賞必加於有功而刑必斷於有罪今臣之
曾不足以當榘質

索隱曰榘音陟林反榘者立榘也質剉刃也謂腰斬者爲榘質也

而

要不足以待斧鉞豈敢以疑事嘗試於王哉雖

以臣爲賤人而輕辱獨不重任臣者之無反復

於王邪且臣聞周有砥礪宋有結綠梁有縣藜

薛綜曰縣藜

一曰美玉

楚有和朴

正義曰縣音玄劉伯莊云玕玉朴也

此四寶者

土之所生良工之所失也而爲天下名器然則

聖王之所棄者獨不足以厚國家乎臣聞善厚

家者取之於國善厚國者取之於諸侯天下有

明主則諸侯不得擅厚者何也爲其割榮也

索隱

曰割榮即上之擅厚謂擅權也

良醫知病人之死生而聖主明於

成敗之事利則行之害則舍之疑則少嘗之雖

舜禹復生弗能改已語之至者臣不敢載之於

書其淺者又不足聽也意者臣愚而不概於王

心邪

徐廣曰一作漑音同○索隱曰戰國策概作關謂關涉於王心也徐注音同非也

亡其言

臣者賤而不可用乎

索隱曰亡猶輕蔑也

自非然者臣願得

少賜游觀之間望見顏色一語無効請伏斧質

於是秦昭王大說乃謝王稽使以傳車

徐廣曰一云使持車

○索隱曰徐按戰國策文也

召范雎於是范雎乃得見於離宮

正義曰長安故城本秦離宮在雍長安北十三里也

詳爲不知永巷而入其中

正義曰永巷宮中獄也

王來而宦者怒逐之曰王至范雎繆

爲曰秦安得王秦獨有太后穰侯耳欲以感怒

昭王昭王至聞其與宦者爭言遂延迎謝曰寡

人宜以身受命久矣會義渠之事急寡人曰暮

自請太后今義渠之事已寡人乃得受命竊閔

然不敏

索隱曰鄒誕生本作惛然音昏又一作閔音敏閔猶昏闇也

敬執賓主之

禮范雎辭讓是日觀范雎之見者羣臣莫不洒

徐廣曰先典反

然變色易容者

索隱曰鄭玄云洒然敬肅之貌

秦王屏左右

宮中虛無人秦王跽而請

索隱曰跽其紀反跽者長跽兩膝被地

曰先

生何以幸教寡人范雎曰唯唯有間秦王復跽

而請曰先生何以幸教寡人范雎曰唯唯若是

者三秦王跽曰先生卒不幸教寡人邪范雎曰

非敢然也臣聞昔者呂尚之遇文王也身為漁

父而釣於渭濱耳若是者交踈也已說而立爲
太師載與俱歸者其言深也故文王遂收功於
呂尚而卒王天下鄉使文王踈呂尚而不與深
言是周無天子之德而文武無與成其王業也
今臣羈旅之臣也交踈於王而所願陳者皆臣
君之事處人骨肉之間願効愚忠而未知王之
心也此所以王三問而不敢對者也臣非有畏
而不敢言也臣知今日言之於前而明日伏誅
於後然臣不敢避也大王信行臣之言死不足
以爲臣患亡不足以爲臣憂漆身爲厲

索隱曰
厲音賴

癩病也言徐生身生瘡如病癩

被髮爲狂不足以爲臣恥且以五

帝之聖焉而死三王之仁焉而死五伯之賢焉

而死烏獲任鄙之力焉而死成荆

徐廣曰一作羌

孟賁

許慎曰成荆古勇士孟賁衛人

王慶忌

吳越春秋曰吳王僚子慶忌

夏育之勇焉

而死

漢書音義曰或云夏育衛人力舉千鈞

死者人之所以不免也

處必然之勢可以少有補於秦此臣之所大願

也臣又何患哉伍子胥橐載而出昭關夜行晝

伏至於陵水無以餬其口

索隱曰劉氏云陵水即栗水也陵栗聲相近故惑也

膝行蒲伏稽首肉袒鼓腹吹篪

徐廣曰一作簫

乞食於

吳市卒興吳國闔閭爲伯使臣得盡謀如伍子

胥加之以幽囚終身不復見是臣之說行也臣
又何憂箕子接輿漆身爲厲被髮爲狂無益於
主假使臣得同行於箕子可以有補所賢之主
是臣之大榮也臣有何耻臣之所恐者獨恐臣
死之後天下見臣之盡忠而身死因以是杜口
裹足莫肯鄉秦耳足下上畏太后之嚴下惑於
姦臣之態索隱曰態謂姦臣諂詐之態也居深宮之中不離阿保
之手終身迷惑無與昭姦正義曰昭明也無與明其姦惡大者宗
廟滅覆小者身以孤危此臣之所恐耳若夫窮
辱之事死亡之患臣不敢畏也臣死而秦治是

范曄蔡澤傳

臣死賢於生秦王跽曰先生是何言也夫秦國
辟遠寡人愚不肖先生乃幸辱至於此是天以
寡人恩先生

徐廣曰亂先生也音囹○索隱曰
二字並音胡困反恩猶汨亂之意

而存

先王之宗廟也寡人得受命於先生是天所以
幸先王而不棄其孤也先生奈何而言若是事
無小大上及太后下至大臣願先生悉以教寡
人無疑寡人也范雎拜秦王亦拜范雎曰大王
之國四塞以爲固北有甘泉谷口

正義曰括地志
云甘泉山一名

鼓原俗名磨石嶺在雍州雲陽縣西北九十里關中記云甘
泉宮在甘泉山上季代永久無復甘泉之名失其實也宮北
云有連山土人爲磨石嶺郊祀志云公孫卿言黃帝得仙寒
門寒門者谷口也按九嶷山中西謂之谷口即古寒門也在

雍州醴泉縣東北四十里

南帶涇渭右隴蜀左關阪奮擊百萬

戰車千乘利則出攻不利則入守此王者之地也民怯於私鬪而勇於公戰此王者之民也王并此二者而有之夫以秦卒之勇車騎之衆以治諸侯譬若馳韓盧而搏蹇兔也

之壯犬也是韓盧爲犬謂施韓盧而搏蹇兔以喻秦彊言取諸侯之易也

索隱曰戰國策云韓盧者天下

而羣臣莫當其位至今閉關十五年不敢窺兵於山東者是穰侯爲秦謀不忠而大王之計有所失也秦王跽曰寡人願聞失計然左右多竊聽者范雎恐未敢言內先言外事以觀秦王之

俯仰因進曰夫穰侯越韓魏而攻齊綱壽非計也少出師則不足以傷齊多出師則害於秦臣意王之計欲少出師而悉韓魏之兵也則不義矣今見與國之不親也越人之國而攻可乎其於計踈矣且昔齊湣王南攻楚破軍殺將再辟地千里正義曰辟尺亦反而齊尺寸之地無得焉者豈不欲得地哉形勢不能有也諸侯見齊之罷弊君臣之不和也興兵而伐齊大破之士辱兵頓皆咎其王曰誰爲此計者乎王曰文子爲之

索隱曰謂

田文孟嘗君也猶戰國策謂田盼田嬰安爲盼子嬰女子也

大臣作亂文子出走故

齊所以大破者以其伐楚而肥韓魏也此所謂
借賊兵齊盜糧者也

索隱曰借音子夜反一作籍亦音同賁音側奚反言爲盜賁糧

也王不如遠交而近攻得寸則王之寸也得尺
亦王之尺也今釋此而遠攻不亦繆乎且昔者
中山之國地方五百里趙獨吞之功成名立而
利附焉天下莫之能害也今夫韓魏中國之處
而天下之樞也王其欲霸必親中國以爲天下
樞以威楚趙楚彊則附趙趙彊則附楚楚趙皆
附齊必懼矣齊懼必卑辭重幣以事秦齊附而
韓魏因可虜也昭王曰吾欲親魏久矣而魏多

變之國也寡人不能親請問親魏奈何對曰王
卑詞重幣以事之不可則割地而賂之不可因
舉兵而伐之王曰寡人敬聞命矣乃拜范雎爲
客卿謀兵事卒聽范雎謀使五大夫綰伐魏拔

懷

徐廣曰昭王三十九年

後二歲拔邢丘客卿范雎復說昭

王曰秦韓之地形相錯如繡秦之有韓也譬如

木之有蠹也

正義曰音妬石挂虫

人之有心腹之病也天

下無變則已天下有變其爲秦患者孰大於韓
乎王不如收韓昭王曰吾固欲收韓韓不聽爲
之奈何對曰韓安得無聽乎主下兵而攻滎陽

則鞏成臯之道不通

正義曰言宜陽陝虢之師不得下相救

北斷太

行之道則上黨之師不下

正義曰言澤潞之師不得下太行相救

王一

興兵而攻滎陽則其國斷而爲三

正義曰新鄭已南一宜陽令二

澤潞

夫韓見必亡安得不聽乎若韓聽而霸事

因可慮矣王曰善且欲發使於韓范雎曰益親

復說用數年矣因請問說曰

正義曰間音閑

臣居山東時

聞齊之有田文不聞其有王也聞秦之有太后

穰侯華陽高陵涇陽不聞其有王也夫擅國之

謂王能利害之謂王制殺生之威之謂王今太

后擅行不顧穰侯出使不報華陽涇陽等擊斷

無諱

諱畏也

高陵進退不請四貴備而國不危者

未之有也爲此四貴者下乃所謂無王也然則

權安得不傾令安得從王出乎臣聞善治國者

乃內固其威而外重其權穰侯使者操王之重

決制於諸侯剖符於天下政適

徐廣曰音征敵

伐國莫

敢不聽戰勝攻取則利歸於陶國弊御於諸侯

索隱曰弊者斷也御者制也言穰侯執權以制御主斷於諸侯也

戰敗則結怨於百姓

而禍歸於社稷詩曰木實繁者披其枝

正義曰披音片被反

披其枝者傷其心大其都者危其國尊其臣者

卑其主崔杼淖齒管齊

索隱曰淖姓也音尼教反漢有淖姬是也高誘曰管

典也言二人典齊權而行弑逆也射王股擢王筋索隱曰言

射王股誤也按崔杼射莊公之股○正義曰淖齒楚人齊湣王臣縣之於廟梁宿昔而

死李允管趙囚主父於沙丘淖齒繒湣王之筋是說二君事縣之於廟梁宿昔而

百日而餓死今臣聞秦太后穰侯用事高陵華

陽涇陽佐之卒無秦王此亦淖齒李允之類也

且夫三代所以亡國者君專授政縱酒馳騁弋

獵不聽政事其所授者妬賢嫉能御下蔽上以

成其私不爲主計而主不覺悟故失其國今自

有秩以上至諸大吏下及王左右無非相國之

人者見王獨立於朝臣竊爲王恐萬世之後有

秦國者非王子孫也昭王聞之大懼曰善於是廢太后逐穰侯高陵華陽涇陽君於關外秦王乃拜范雎爲相收穰侯之印使歸陶因使縣官給車牛以徙千乘有餘到關關閱其寶器寶器珍怪多於王室秦封范雎以應號爲應侯

索隱曰劉

氏云河東臨晉有應亭則秦地有應也又按本紀以應爲太后養地解者云在潁川之應鄉未知孰是○正義曰括地志云故應城古應鄉在汝州魯山縣東四十里也當是時秦昭王四十一年也

范雎既相秦秦號曰張祿而魏不知以爲范雎已死久矣魏聞秦且東伐韓魏魏使須賈於秦范雎聞之爲微行敝衣間步之邸

正義曰劉云諸國客館

見須賈須賈見之而驚曰范叔固無恙乎范睢
曰然須賈笑曰范叔有說於秦邪曰不也睢前
日得過於魏相故亡逃至此安敢說乎須賈曰
今叔何事范睢曰臣爲人庸貨須賈意哀之留
與坐飲食曰范叔一寒如此哉乃取其一綈袍
以賜之索隱曰綈厚繒也音啼蓋今之麕袍須賈因問
曰秦相張君公知之乎吾聞幸於王天下之事
皆決於相君今吾事之去留在張君孺子豈有
客習於相君者哉索隱曰劉氏云孺子蓋謂睢爲小子范睢曰主
人翁習知之唯睢亦得謁睢請爲君見於張君

須賈曰吾馬病車軸折非大車駟馬吾不出范
雎曰願爲君借大車駟馬於主人翁范雎歸取
大車駟馬爲須賈御之入秦相府府中望見有
識者皆避匿須賈怪之至相舍門謂須賈曰待
我我爲君先入通於相君須賈待門下持車良
久問門下曰范叔不出何也門下曰無范叔須
賈曰鄉者與我載而入者門下曰乃吾相張君
也須賈大驚自知見賈乃肉袒膝行因門下人
謝罪於是范雎盛帷帳侍者甚衆見之須賈頓
首言死罪曰賈不意君能自致於青雲之上賈

不敢復讀天下之書不敢復與天下之事賈有
湯鑊之罪請自屏於胡貉之地唯君死生之范
睢曰汝罪有幾曰擢賈之髮以續賈之罪尚未
足范睢曰汝罪有三耳昔者楚昭王時而申包
胥爲楚卻吳軍楚王封之以荆五千戶包胥辭
不受爲丘墓之寄於荆也今睢之先人丘墓亦
在魏公前以睢爲有外心於齊而惡睢於魏齊
公之罪一也當魏齊辱我於廁中公不止罪二
也更醉而溺我公其何忍乎罪三矣然公之所
以得無死者以綈袍戀戀有故人之意故釋公

乃謝罷入言之昭王罷歸須賈須賈辭於范雎
范雎大供具盡請諸侯使與坐堂上食飲甚設
而坐須賈於堂下置莖豆其前令兩黥徒夾而
馬食之數曰爲我告魏王急持魏齊頭來不然
者我且屠大梁須賈歸以告魏齊魏齊恐亡走
趙匿平原君所范雎既相王稽謂范雎曰事有不
可知者三有不可奈何者亦三宮車一日晏駕
應劭曰天子當晏安起早作如方崩殯故稱晏駕韋昭曰
凡初崩爲晏駕者臣子之心猶謂宮車當駕而晚出是事
之不可知者一也君卒然捐館舍是事之不可
知者二也使臣卒然填溝壑是事之不可知者

三也宮車一日晏駕君雖恨於臣無可奈何君卒然捐館舍君雖恨於臣亦無可奈何使臣卒然填溝壑君雖恨於臣亦無可奈何范睢不懌乃入言於王曰非王稽之忠莫能內臣於函谷關非大王之賢聖莫能貴臣今臣官至於相爵在列侯王稽之官尚止於謁者非其內臣之意也昭王召王稽拜爲河東守三歲不上計司馬彪曰

凡郡長治民進賢勸功決訟檢姦常以春行所至縣勸民農桑振救乏絕秋冬遣無害吏案訊問諸囚平其罪法論課殿最歲盡遣吏上計

又任鄭安平昭王以爲將軍范睢於是

散家財物盡以報所嘗困厄者一飯之德必償

睚眦之怨必報

索隱曰睚音崖賣反眦音士資反睚眦謂相嗔怒而見齒也

范睢

相秦二年秦昭王之四十二年東伐韓少曲

徐廣

曰蘇代曰起少曲一日而斷太行

高平拔之

正義曰括地志云南韓王

索隱曰劉氏以爲蓋在太行西南故城在懷州河陽縣西北四十里俗謂之韓王城非也秦時周相王以與鄭紀年云鄭侯使辰歸晉陽向更名高平拔之則少曲當與高平相近

秦昭王聞魏齊在平原君所欲爲范

睢必報其仇乃詳爲好書遺平原君曰寡人聞

君之高義願與君爲布衣之友君幸過寡人寡

人願與君爲十日之飲平原君畏秦且以爲然

而入秦見昭王昭王與平原君飲數日昭王謂

平原君曰昔周文王得呂尚以爲太公齊桓公

得管夷吾以爲仲父今范君亦寡人之叔父也
范君之仇在君之家願使人歸取其頭來不然
吾不出君於關平原君曰貴而爲友者爲賤也
富而爲交者爲貧也索隱曰上爲如字下爲音于僞反以言富貴而結交情深者爲有貧賤之時不可忘之也夫魏齊者勝之友也在固不出也今又
不在臣所昭王乃遺趙王書曰王之弟在秦范
君之仇魏齊在平原君之家王使人疾持其頭
來不然吾舉兵而伐趙又不出王之弟於關趙
孝成王乃發卒圍平原君家急魏齊夜亡出見
趙相虞卿虞卿度趙王終不可說乃解其相印

與魏齊亡間行念諸侯莫可以急抵者乃復走
大梁欲因信陵君以走楚信陵君聞之畏秦猶
豫未肯見曰虞卿何如人也時侯嬴在旁曰人
固未易知知人亦未易也夫虞卿躡屣擔簦一
見趙王賜白璧一雙黃金百鎰再見拜爲上卿
三見卒受相印封萬戶侯當此之時天下爭知
之夫魏齊窮困過虞卿虞卿不敢重爵祿之尊
解相印捐萬戶侯而間行急士之窮而歸公子
公子曰何如人人固不易知知人亦未易也信
陵君大慙駕如野迎之魏齊聞信陵君之初難

見之怒而自剄趙王聞之卒取其頭予秦秦昭

王乃出平原君歸趙趙昭王四十三年秦攻韓汾

陘拔之

索隱曰陘音邢陘蓋在韓之西界與汾相近也○正義曰按陘庭故城在絳州曲沃縣西北二十里

汾水之陽

因城河上廣武

索隱曰劉氏云此河上蓋近河之北之地本屬韓今秦得而城

後

五年昭王用應侯謀縱反間賣趙趙以其故令

馬服子代廉頗將

索隱曰馬服子趙括之號也虞喜志林云馬兵之首也號曰馬服者言能

服馬也鄒氏頗音反波反

秦大破趙於長平遂圍邯鄲已而與

武安君白起有隙言而殺之

徐廣曰在五十年○索隱曰徐據秦本紀及表

而知也任鄭安平使將擊趙鄭安平為趙所困急

以兵二萬人降趙應侯席蓐請罪秦之法任人

而所任不善者各以其罪罪之於是應侯罪當
收三族秦昭王恐傷應侯之意乃下令國中有
敢言鄭安平事者以其罪罪之而加賜相國應
侯食物日益厚以順適其意後二歲王稽爲河
東守與諸侯通坐法誅

徐廣曰五十二年

而應侯日益

以不懌昭王臨朝歎息應侯進曰臣聞主憂臣

辱主辱臣死今大王中朝而憂臣敢請其罪昭

王曰吾聞楚之鐵劍利而倡優拙

正義曰論士能善卒不戰

夫

鐵劍利則士勇倡優拙則思慮遠夫以遠思慮

而御勇士吾恐楚之圖秦也夫物不素具不可

以應卒今武安君既死而鄭安平等畔內無良

將而外多敵國吾是以憂欲以激勵應侯索隱曰傲

擊應侯懼不知所出蔡澤聞之往入秦也

蔡澤者燕人也游學于諸侯正義曰不待禮曰干小大甚衆

不遇而從唐舉相荀卿曰梁有唐舉○索隱曰荀卿書作唐苦曰吾聞先

生相李兌曰百日之內持國秉政有之乎索隱曰按

視而笑曰先生昌臯巨肩左傳云國子實執齊秉服虔曰秉摧柄也曰有之曰若臣者何如唐舉執

臯謂臯如蝎虫也巨肩肩巨於項徐廣曰昌一作倡倡一作仰巨一作渠○索隱曰昌

臯曲也徐廣曰一作率○索隱曰上臯音徒回反臯顏謂顏臯

貌臯回若臯梧然也臯音烏曷反臯謂臯感是眉臯

又攣曲也

吾聞聖人不相殆先生乎蔡澤知唐舉戲

之乃曰富貴吾所自有吾所不知者壽也願聞

之唐舉曰先生之壽從今以往者四十三歲蔡

澤笑謝而去謂其御者曰吾持梁刺齒肥

持梁作飯

也刺齒二字當作齧又作齧也○索隱曰持梁謂作梁米飯而持其器以食也刺齒肥當爲齧肥謂食肥肉也

躍

馬疾驅懷黃金之印結紫綬於要捐讓人主之

前食肉富貴四十二年足矣去之趙見逐入韓

魏遇奪金帛於塗

爾雅曰欸足者謂之萑郭璞曰鼎曲脚○索隱曰金音日又萑音歷欸者空

也言其足中空也而郭氏云鼎曲脚者以欸訓曲故云曲脚也

聞應侯任鄭安平王

稽皆負重罪於秦應侯內慙蔡澤乃西入秦將

見昭王使人宣言以感怒應侯曰燕客蔡澤天下雄俊弘辯智士也彼一見秦王秦王必困君而奪君之位應侯聞曰五帝三代之事百家之說吾既知之衆口之辯吾皆摧之是惡能困我而奪我位乎使人召蔡澤蔡澤入則揖應侯應侯固不悅及見之又倨應侯因讓之曰子常宣言欲代我相秦寧有之乎對曰然應侯曰請問其說蔡澤曰吁君何見之晚也夫四時之序成功者去夫人生百體堅彊手足便利耳目聰明而心聖智豈非士之願與應侯曰然蔡澤曰質

仁秉義行道施德得志於天下天下懷樂敬愛而尊慕之皆願以爲君王豈不辯智之期與應侯曰然蔡澤復曰富貴顯榮成理萬物使各得其所性命壽長終其天年而不夭傷天下繼其統守其業傳之無窮名實純粹澤流千里

徐廣曰一

本無此字

世世稱之而無絕與天地終始豈道德之

符而聖人所謂吉祥善事者與應侯曰然蔡澤

曰若夫秦之商君楚之吳起越之大夫種其卒

然亦可願與應侯知蔡澤之欲困已以說

式絀反

復謬曰何爲不可夫公孫鞅之事孝公也極身

無貳慮盡公而不顧私設刀鋸以禁奸邪信
賞罰以致治披腹心示情素蒙怨咎欺舊友奪
魏公子印安秦社稷利百姓卒爲秦禽將破敵
攘地千里吳起之事悼王也使私不得害公讒
不得蔽忠言不取苟合行不取苟容不爲危易
行行義不辟難徐廣曰一云不困毀此言然爲霸主強國不辭
禍凶大夫種之事越王也主雖困辱悉忠而不
解主雖絕亡盡能而弗離成功而弗矜貴富而
不驕怠若此三子者固義之至也忠之節也是
故君子以義死難視死如歸生而辱不如死而

榮士固有殺身以成名唯義之所在雖死無所
恨何爲不可哉蔡澤曰主聖臣賢天下之盛福
也君明臣直國之福也父慈子孝夫信妻貞家
之福也故比干忠而不能存殷子胥智而不能
完吳申生孝而晉國亂是皆有忠臣孝子而國
家滅亂者何也無明君賢父以聽之故天下以
其君父爲僇辱而憐其臣子

索隱曰言以比干子胥
申生皆至忠孝而見誅

放故今天下言爲其君父
之所僇而憐其臣子也

今商君吳起大夫種之爲

人臣是也其君非也故世稱三子致功而不見
德豈慕不遇世死乎夫待死而後可以立忠成

名是微子不足仁孔子不足聖管仲不足大也
夫人之立功豈不期於成全邪身與名俱全者
上也名可法而身死者其次也名在僇辱而身
全者下也於是應侯稱善蔡澤少得閒因曰夫
商君吳起大夫種其爲人臣盡忠致功則可願
矣閔天事文王周公輔成王也豈不亦忠聖乎以
君臣論之商君吳起大夫種其可願孰與閔天
周公哉應侯曰商君吳起大夫種弗若也蔡澤
曰然則君之主慈仁任忠博厚舊故其賢智與
有道之士爲膠漆義不倍功臣孰與秦孝公楚

悼王越王乎應侯曰未知何如也蔡澤曰今主

親忠臣不過秦孝公楚悼王越王君之設智能

爲主安危修政治亂彊兵批患折難

索隱曰批音白結反又音

豐雞反批患謂擊而却之折音之列反

廣地殖穀富國足家彊主尊

杜稷顯宗廟天下莫敢欺犯其主主之威蓋震
海內功彰萬里之外聲名光輝傳於千世君孰
與商君吳起大夫種應侯曰不若蔡澤曰今主
之親忠臣不忘舊故不若孝公悼王句踐而君
之功績愛信親幸又不若商君吳起大夫種然
而君之祿位貴盛私家之富過於三子而身不

退者恐患之甚於三子竊爲君危之語曰日中則移月滿則虧物盛則衰天地之常數也進退盈縮與時變化聖人之常道也故國有道則仕國無道則隱聖人曰飛龍在天利見大人不義而富且貴於我如浮雲今君之怨已讎而德已報意欲至矣而無變計竊爲君不取也且夫翠鵠犀象其處勢非不遠死也而所以死者惑於餌也蘇秦智伯之智非不足以辟辱遠死也而所以死者惑於貪利不止也是以聖人制禮節欲取於民有度使之以時用之有止故志不溢

行不驕常與道俱而不失故天下承而不絕昔者齊桓公九合諸侯一匡天下至於葵丘之會有驕矜之志畔者九國吳王夫差兵無敵於天下勇彊以輕諸侯陵齊晉故遂以殺身亡國夏

育太史噉叱呼

徐廣曰一作啗○索隱曰二人勇者夏育賁育也噉音皎○正義曰呼大故反

駭三軍然而身死於庸夫

索隱曰高誘云夏育爲田搏所殺然太史噉未知誰

之所然恐非齊襄王時太史也

此皆乘至盛而不返道理不居卑

退處儉約之患也夫商君爲秦孝公明法令禁

姦本尊爵必賞有罪必罰平權衡正度量調輕

重决裂阡陌以靜生民之業而一其俗勸民耕

農利土一室無一事力田穡積習戰陳之事是以兵動而地廣兵休而國富故秦無敵於天下立威諸侯成秦國之業功已成矣而遂以車裂楚地方數千里持戟百萬白起率數萬之師以與楚戰一戰舉鄢郢以燒夷陵再戰南并蜀漢又越韓魏而攻彊趙北坑馬服誅屠四十餘萬之衆盡之于長平之下流血成川沸聲若雷遂入圍邯鄲使秦有帝業楚趙天下之彊國而秦之仇敵也自是之後楚趙皆懾伏不敢攻秦者白起之勢也身所服者七十餘城功已成矣而

遂賜劔死於杜郵吳起爲楚悼王立法卑滅大
臣之威重罷無能廢無用損不急之官塞私門
之請一楚國之俗禁游客之民精耕戰之士南
收楊越北并陳蔡破橫散從使馳說之士無所
開其口禁朋黨以厲百姓定楚國之政兵震天
下威服諸侯功已成矣而卒枝解大夫種爲越
王深謀遠計免會稽之危以亡爲存因辱爲榮
鰲章入邑

索隱曰劉氏云入猶充也
謂招携離散充蒲城邑也

辟地殖穀率四

方之士專上下之力輔句踐之賢報夫差之讎
卒擒勁吳令越成霸功已彰而信矣句踐終負

而殺之此四子者功成不去禍至於此此所謂

信而不能誑往而不能返者也

索隱曰信音申誑音屈謂志已展而不退

范蠡知之超然辟世長爲陶朱公君獨不觀夫

博者乎或欲大投或欲分功

班固弈拍曰博縣於投不必在行駟謂投投瓊

也○索隱曰言夫博弈或欲大投其瓊以致勝或觀其勢弱則大投地分而分功以遠救事具小爾雅方言云所以投博

謂之枰枰局也

此皆君之所明知也今君相秦計不下席

謀不出廊廟坐制諸侯利施三川以實宜陽

正義

曰施猶展也言伐得三川之地以實宜陽言展開三川實宜陽

決羊腸之險塞太行

之道又斬范中行之塗六國不得合從棧道千

里通於蜀漢使天下皆畏秦秦之欲得矣君之

功極矣此亦秦之分功之時也如是而不退則

商君白公

徐廣曰白起

吳起大夫種是也吾聞之鑒於

水者見面之容鑒於人者知吉與凶書曰成功之下不可久處四子之禍君何居焉君何不以此時歸相印讓賢者而授之退而巖居川觀必有伯夷之廉長爲應侯世世稱孤而有許由延陵季子之讓喬松之壽孰與以禍終哉即君何居焉忍不能自離疑不能自決必有四子之禍矣易曰元龍有悔此言上而不能下信而不能誦往而不能自返者也願君孰計之應侯曰善

吾聞欲而不知止失其所以欲有而不知足失其所以有先生幸教睢敬受命於是乃延入坐爲上客後數日入朝言於秦昭王曰客新有從山東來者曰蔡澤其人辯士明於三王之事五伯之業世俗之變足以寄秦國之政臣之見人甚衆莫及臣不如也臣敢以聞秦昭王召見與語大說之拜爲客卿應侯因謝病請歸相印昭王彊起應侯應侯遂稱病篤范雎免相昭王新說蔡澤計畫遂拜爲秦相東出周室蔡澤相秦數月人或惡之懼誅乃謝病歸相印號爲綱成

君居秦十餘年事昭王孝文王莊襄王卒事始皇帝爲秦使於燕二年而燕使太子丹入質於秦

太史公曰韓子稱長袖善舞多錢善賈信哉是言也范雎蔡澤卅所謂一切辯士然游說諸侯至白首無所遇者非計策之拙所爲說力少也及二人羈旅入秦繼踵取卿相垂功於天下者固彊弱之勢異也然士亦有偶合賢者多如此二子不得盡意豈可勝道哉然二子不困凡惡

能激乎

索隱曰二子范雎蔡澤也雎厄於齊折脅摺齒澤困於趙被逐奔燕是也惡音烏激音擊

索隱述贊曰

應侯始困

託載而西

說行計立

貴乎寵稽

倚秦市趙

卒報魏齊

網成辯智

范雎招携

勢利傾奪

一言成蹊

范雎蔡澤列傳第十九

史記七十九

范雎蔡澤傳

樂毅列傳第二十

史記八十

樂毅者其先祖曰樂羊樂羊爲魏文侯將伐取

中山

正義曰今定州

魏文侯封樂羊以靈壽

徐廣曰屬常山○索隱曰

地理志常山有靈壽縣中山桓公所都之地○正義曰今鎮州靈壽

樂羊死葬於靈壽其

後子孫因家焉中山復國至趙武靈王時復滅

中山

索隱曰中山魏雖滅之尚不絕祀故後更復國至趙武靈王又滅之也

而樂氏後

有樂毅樂毅賢好兵趙人舉之及武靈王有沙

丘之亂

徐廣曰趙有沙丘宮近鉅鹿

乃去趙適魏聞燕昭王以

子之之亂而齊大敗燕燕昭王怨齊未嘗一日

而忘報齊也燕國小辟遠力不能制於是屈身

下士先禮郭隗

正義曰說苑云燕昭問於隗曰寡人地狹民寡齊人取薊八城匈奴驅馳樓煩

之下以孤之不肖得承宗廟恐社稷危存之有道乎隗曰帝者之臣其各臣其實師王者之臣其各臣其實友霸者之臣其各臣其實僕危困國之臣其各臣其實虜今王將自東面目指氣使以求臣則斯役之才至矣北面聽朝不失揖讓之理以求臣則人臣之才至矣北面等禮不棄之以勢以求臣則朋友之才至矣西面逡巡以求臣則師傳之才至矣誠欲與王霸同道隗請為天下之士開路於是常置隗為上客

以招賢者樂毅於是為

魏昭王使於燕燕王以客禮待之樂毅辭讓遂

委質為臣燕昭王以為亞卿久之當是時齊湣

王彊南敗楚相唐昧於重丘

索隱曰昧音莫葛反地理志重丘縣名屬平原

正義曰在冀州城武縣界

西摧三晉於觀津

索隱曰地理志觀津縣名屬信都漢

初屬清河也正義曰在冀州武邑縣東南二十五里

遂與三晉擊秦助趙滅

中山破宋廣地千餘里與秦昭王爭重爲帝已而復歸之諸侯皆欲背秦而服於齊湣王自矜百姓弗堪於是燕昭王問伐齊之事樂毅對曰齊霸國之餘業也地大人衆未易獨攻也王必欲伐之莫如與趙及楚魏於是使樂毅約趙惠文王別使連楚魏令趙閼秦

徐廣曰閼進說之意○索隱曰閼音田盪反字

與音同

以伐齊之利諸侯害齊湣王之驕暴皆爭

合從與燕伐齊樂毅還報燕昭王悉起兵使樂毅爲上將軍趙惠文王以相國印授樂毅樂毅於是并護趙楚韓魏燕之兵以伐齊

索隱曰護謂總領之也

破之濟西諸侯兵罷歸而燕軍樂毅獨追至于
臨菑齊湣王之敗濟西亡走保於莒樂毅獨留
徇齊齊皆城守樂毅攻入臨菑盡取齊寶財物
祭器輸之燕燕昭王大說親至濟上勞軍行賞
饗士封樂毅於昌國徐廣曰屬齊○索隱曰地理志將
州淄川縣東北四十里也號爲昌國君於是燕昭王收齊國獲
以歸而使樂毅復以兵平齊城之不下者樂毅
留徇齊五歲下齊七十餘城皆爲郡縣以屬燕
唯獨莒即墨未服正義曰即墨今萊州會燕昭王死子立爲
燕惠王惠王自爲太子時嘗不快於樂毅及即

位齊之田單聞之乃縱反間於燕曰齊城不下者兩城耳然所以不早拔者聞樂毅與燕新王有隙欲連兵且留齊南面而王齊齊之所患唯恐他將之來於是燕惠王固已疑樂毅得齊反間乃使騎劫代將索隱曰燕將姓名而召樂毅樂毅知燕惠王之不善代之畏誅遂西降趙趙封樂毅於觀津號曰望諸君索隱曰望諸澤名在齊蓋趙有之故號焉戰國策望作藍也尊寵樂毅以警動於燕齊齊田單後與騎劫戰果設詐誑燕軍遂破騎劫於即墨下而轉戰逐燕北至河上

正義曰滄德二州之北河

盡復得齊城而迎襄王於莒入

于臨菑燕惠王後悔使騎劫代樂毅以故破軍
亡將失齊又怨樂毅之降趙恐趙用樂毅而乘
燕之弊以伐燕燕惠王乃使人讓樂毅且謝之
曰先王舉國而委將軍將軍爲燕破齊報先王
之讎天下莫不震動寡人豈敢一日而忘將軍
之功哉會先王棄羣臣寡人新即位左右誤寡
人寡人之使騎劫代將軍爲將軍久暴露於外
故召將軍且休計事將軍過聽以與寡人有隙
遂捐燕歸趙將軍自爲計則可矣而亦何以報
先王之所以遇將軍之意乎樂毅報遺燕惠王

書曰臣不佞不能奉承王命以順左右之心恐
傷先王之明有害足下之義故遁逃走趙今足
下使人數之以罪臣恐侍御者不察先王之所
以畜幸臣之理又不白臣之所以事先王之心
故敢以書對臣聞賢聖之君不以祿私親其功
多者賞之其能當者處之故察能而授官者成
功之君也論行而結交者立名之士也臣竊觀
先王之舉也見有高世主之心

正義曰樂毅見燕昭王有自高尊世上人

主之心故假魏節使燕

故假節於魏以身得察於燕先王過

舉則之賓客之中立之羣臣之上不謀父兄

正義

曰杜預云兄
同姓羣臣也

以爲亞卿臣竊不自知自以爲奉令
承教可幸無罪故受令而不辭先王命之曰我
有積怨深怒於齊不量輕弱而欲以齊爲事臣
曰夫齊霸國之餘業而最勝之遺事也練於兵
甲習於戰攻王若欲伐之必與天下圖之與天
下圖之莫若結於趙且又淮北宋地楚魏之所
欲也趙若許而約四國攻之齊可大破也先王
以爲然具符節南使臣於趙顧反命起兵擊齊
以天之道先王之靈河北之地隨先王而舉之
濟上

正義曰濟水
之上在齊上

濟上之軍受命擊齊大敗齊人

輕卒銳兵長驅至國齊王遁而走莒僅以身免

珠玉財寶車甲珍器盡收入于燕齊器設於寧

臺索隱曰燕臺也○正義曰括地志云燕元英磨室二宮皆燕宮在幽州薊縣西四里寧臺之下大呂

陳於元英索隱曰大呂齊鍾名元英燕宮殿名也故鼎反乎磨室徐廣曰磨

歷也○索隱曰燕鼎前輸於齊今反入於磨室磨室亦宮名戰國策作歷室也○正義曰括地志云歷室燕宮名也高誘

云燕噲亂齊伐燕殺噲得鼎今反歸燕故鼎薊丘之植植於汶篁徐廣曰竹田曰篁謂

燕之疆界移於齊之汶水○索隱曰薊丘燕所都之地言燕之薊丘所植植齊王汶上之竹徐注非也○正義曰幽州薊

地西北隅有薊丘又汶水源出兗州博城縣東北原山西南入師自五伯已來功未有

及先王者也先王以爲慊於志索隱曰慊音苦簾反亦作噉噉者常慊然

而不愜其志也故裂地而封之使得比小國諸侯臣竊不

自知自以爲奉命承教可幸無罪是以受命不
辭臣聞賢聖之君功立而不廢故著於春秋蚤
知之士名成而不毀故稱於後世若先王之報
怨雪恥夷萬乘之彊國收八百歲之蓄積及至
棄羣臣之日餘教未衰執政任事之臣修法令
慎庶孽施及乎萌隸皆可以教後世臣聞之善
作者不必善成善始者不必善終昔伍子胥說
聽於闔閭而吳王遠迹至郢夫差弗是也賜之
鴟夷而浮之江吳王不寤先論之可以立功故
沈子胥而不悔子胥不蚤見主之不同量是以

至於入江而不化

索隱曰言子胥怨恨故雖投江而神不化猶為波濤之神也

夫免

身立功以明先王之迹臣之上計也離毀辱之

誹謗

索隱曰誹音方味反

墮先王之名

索隱曰墮音許規反

臣之所大

恐也臨不測之罪以幸為利義之所不敢出也

索隱曰謂既臨不測之罪以幸免為利今我仍義先王之恩雖身託外國而心亦不敢出也

臣聞古之

君子交絕不出惡聲

正義曰君子之人交絕不說已長而談彼短

忠臣

去國不絜其名

索隱曰言忠臣去離本國不自絜其名云已無罪故禮曰大夫去其國不說人

以無罪是也○正義曰言不絜已名行而咎於君若箕子不忍言躬惡是也

臣雖不佞

索隱曰不佞猶不

佞猶不才也

數奉教於君子矣

索隱曰數音朔言我以數經奉教令於君子君子即識禮

之人謂已在外猶云已罪不說王之有非故下云不察疎遠之行斯亦忠臣之節

恐侍御者之

親左右之說不察疏遠之行故敢獻書以聞唯

君王之留意焉

夏侯玄曰觀樂生遺燕惠王書其殆庶乎知機合道以禮始終者與又其喻昭

王曰伊尹放太甲而不疑太甲受放而不怨是存大業於至公而以天下爲心者也夫欲極道德之量務以天下爲心者必致其主於盛隆合其趣於先王苟君臣同符則大業定矣于斯時也樂生之志千載一遇夫千載一遇之世亦將行千載一隆之道豈其易迹當時止於兼井而已哉夫兼井者非樂生之所屑疆燕而廢道又非樂生之所求不屑苟利心無近事不求小成斯意兼天下者也則率齊之事所以運其機而動四海也夫討齊以明燕主之義此兵不興於爲利矣圍城而害不加於百姓此仁心著於遐邇矣率國不謀其功除暴不以威力此至德全於天下矣邁全德以率列國則幾於湯武之事矣樂生方恢大綱以縱二城收民明信以待其弊將使即墨莒人顧仇其上願釋干戈賴我猶親善守之智無所施之然則求仁得仁即墨大夫之義仕窮則從微子適周之道開彌廣之路以待田單之徒長容善之風以申齊土之志使夫忠者遂節勇者義著昭之東海屬之華夷我澤如春民應如草道光宇宙賢智託心鄰國傾慕四海延頸思戴燕

主仰望風聲二城必從則王業隆矣雖淹留於兩邑乃致速於天下也不幸之變世所不圖敗於垂成時運固然若乃逼之以威劫之以兵攻取之事求欲速之功使燕齊之士流血於二城之下麥殺傷之殘以示四海之人是縱暴易亂以成其私鄰國望之其猶豺虎虎既大墮稱兵之義而喪濟溺之仁且虧齊士之節發廉善之風掩宏通之度棄王德之隆雖二城幾於可拔霸王之事逝其遠矣然則燕雖兼齊其與世主何以殊哉其與鄰國何以相傾樂生豈不知拔二城之速哉哉碩城拔而業垂也豈不慮不速之致變哉碩業於是燕垂與變同繇是觀之樂生之不屠二城未可量也

王復以樂毅子樂間爲昌國君

索隱曰間音紀閑反

而樂

毅往來復通燕燕趙以爲客卿樂毅卒於趙

張華

曰望諸君家在邯鄲西數里

樂間居燕三十餘年燕王喜用其

相栗腹之計

索隱曰栗姓腹名漢有栗姬

欲攻趙而問昌國君

樂間樂間曰趙四戰之國也

索隱曰言趙數距四方之敵故云四戰之國○

正義曰東隣燕齊西邊秦樓煩南界韓魏北迫匈奴

其民習兵伐之不可燕王

不聽遂伐趙趙使廉頗擊之大破栗腹之軍於
鄢禽栗腹樂乘樂乘者樂閒之宗也於是樂閒
奔趙趙遂圍燕燕重割地以與趙和趙乃解而
去燕王恨不用樂閒樂閒既在趙乃遺樂閒書
曰紂之時箕子不用犯諫不怠以冀其聽商容
不達身祇辱焉以冀其變及民志不入獄囚自
出

索隱曰民志不入謂國亂而人離心向外故云不入獄囚自出又獄囚自出是政亂而士師不爲之守法也

然後

二子退隱故紂負桀暴之累二子不失忠聖之
名何者其憂患之盡矣今寡人雖愚不若紂之

暴也燕民雖亂不若殷民之甚也室有語不相

盡以告鄰里

正義曰言室有忿爭不決必告隣里今故以書相告也

二者寡人

不爲君取也

正義曰二者謂燕君未如紂燕民未如殷民復相告子反燕以疑君民之惡是寡人不謂君

取之

樂間樂乘怨燕不聽其計二人卒留趙

趙封樂乘爲武襄君

索隱曰樂乘樂毅之宗人也

其明年樂

乘廉頗爲趙圍燕燕重禮以和乃解後五年歲趙

孝成王卒襄王使樂乘代廉頗廉頗攻樂乘樂

乘走廉頗亡入魏其後十六年而秦滅趙其後

二十餘年高帝過趙問樂毅有後世乎對曰有

樂叔高帝封之樂鄉

徐廣曰在北新城○正義曰地理志云信都有樂鄉縣

號曰

華成君華成君樂毅之孫也而樂氏之族有樂
瑕公樂臣公一作巨公趙且爲秦所滅亡之齊高密樂
臣公善脩黃帝老子之言顯聞於齊稱賢師

太史公曰始齊之蒯通及主父偃讀樂毅之報
燕王書未嘗不廢書而泣也樂臣公學黃帝老
子其本師號曰河上丈人不知其所出河上丈
人教安期生安期生教毛萵公毛萵公教樂瑕公
樂瑕公教樂臣公索隱曰本亦作巨公樂臣公教蓋公索隱
曰蓋音古闔反蓋公史不記名蓋公教於齊高密膠西爲曹相國

師

索隱述贊曰

昌國忠謹

人臣所無

連兵五國

濟西爲墟

燕王將受

空聞報書

義士慷慨

明君軼問

閒乘繼將

芳規不渝

樂毅列傳第二十

史記八十

[General Information]

□□=□□□□□□□ □□ 21
□□

□□=(□□)□□□□

□□=166

□□□=□□□□□

□□□□=1936

SS□=12459900

DX□=000007545292

url=http://book2.d
uxiu.com/search?&c
hannel=search>ag
=&sw=%B0%D9%F1%C4%
B1%BE%B6%FE%CA%AE%
CB%C4%CA%B7++%CA%B
7%BC%C7++21++%C1%D
0%B4%AB&year=§
year=&seb=0&pid=0&
showc=0&fenleiID=&
Pages=1&searchtype
=1